

To'on yó'o nákaní sa'a ndidaá ña vei koo

Xí'o Juan kuendá sa'a ndidaá ña ni xini na

1 ¹ Ña yó'o kúú ña ni na'a Jesucristo noo ndidaá na xínkuáchí noo ná, ña ni xi'o mií Ndios noo ná sa'a ndidaá ña'a yachi vei koo. Ta ni tanda'á ná iin ángel nákaa tixi ndá'a ná, ni kii na ni na'a na ndidaá ña yó'o noo yú'u, Juan, na xínkuáchí noo Jesucristo. ² Sa'a ñoó xí'o ndaa yu'u kuendá sa'a ndidaá to'on ni xi'o Ndios nooí, xín sa'a to'on ni ka'an Jesucristo, ña kían ni xinií xín nooí. ³ Ndiká'án ví na ká'i tuti yó'o, ta ndiká'án ví na seídó'o ña nákanian sa'a ña vei koo, ta nátaan vá'a na ña ini nío ná, dá chi sa kúyati va kuu vei koo ndidaá ña ká'an sa'a.

Ká'an Juan ndisá'án xín ndin usa ve'e ño'o kuendá Jesús ñó'o chí kuendá Asia

⁴ Yu'u kúú Juan, ta ká'an yu'u ndisá'án xín ndin usa ve'e ño'o kuendá Jesús ñó'o chí kuendá Asia. Ta ná kee Ndios ña maní xín ndo'ó, ta ná ki'o na ña kandeí va'a ndó. Mií ná kúú ná, ta mií ná ni sa kuu na, ta mií ná kúú na kasaa. Ta dión ta'ani ná kee ndin usa espíritu xín ndo'ó, tá'an espíritu ió noo Ndios, noo ió na dándáki na. ⁵ Ta dión ta'ani ná kee Jesucristo xín ndo'ó. Ta noón kúú na xi'o ndaa kuendá sa'a ña ndaa, ta mií ná kúú na mií noó ni natakí iin íchi noó na ni xi'i, ta iin tó'on mií ná kúú diní noo ndidaá rey dándáki noño'o yó'o. Ta mií ná kú'u ini sa'a yo, ta ni dandóo na kuachi yó xín ni ná, ⁶ ta ni ndee na yó kakuu yó rey xín duti, dá koni kuáchí yó noo tatá na Ndios. Ta daá kuití ná natiin na ñaño'ó, ta ná dándáki na ndidaá ña'a. Dión ná koo. ⁷ ¡Kande'é ndó! iTein viko káa kixi Jesús! Ta ndidaá tá'an ñayuu koni ñaá xín noo ná, ta nda taa ni sa'ání ñaá koni túu ñaá rá noo kii na. Ta ndidaá tá'an ñayuu ndéi iin rá iin ñoo noo kúú ñayuu yó'o kuaki na xín ndirá noo ná tá ná kasandaá kuu yó'o. Dión ná koo.

⁸ “Yu'u kúú to'on mií noó xín to'on noo ndí'i, ta kúú na mií sa'a xín na noo ndí'i”, kaá na kúú sato'o yo. Mií ná kúú ná, ta mií ná ni sa kuu na, ta mií ná kúú na kasaa, ta mií ná kándéé kée ndidaá tá'an ña'a.

Ni xini Juan Jesús, ta ndato nda'o káa na

⁹ Ta yu'u kúú Juan, na kúú ñani ndo, ta ndó'o ta'ani nío yu'u táto'on ndó'o nío ndo'ó, ta nákaaí tixi ndá'a Ndios táto'on ñó'o ta'ani ndo'ó, ta xí'o ndeé inií tein tandó'ó táto'on xí'o ndeé ta'ani ini ndo'ó sa'a ña ndíta yó xín Jesucristo. Ta sa'a ña dána'i to'on Ndios, xín sa'a ña ká'in sa'a Jesucristo, sa'a ñoó ni sa'an ta né'e choon ni dankoo ra yu'u iin yúku in ini taño'o noo naní Patmos.

¹⁰ Tein iin kuu ni kaxi mií sato'o yo Ndios keká'ano yó na, daá ñoo nákaa yu'u tixi ndá'a Espíritu ii ná. Ta kúu ni seídó'i chí sata dí'ai ña ni'i nda'o ni ka'an iin tachi ñayuu. Táto'on ki'o ni'i ká'an trompeta, ki'o dión ni'i ni ka'an tachi ñoo. ¹¹ Dá ni ka'an xí'ín:

—Yu'u kúu to'on mií noó xí'ín to'on noo ndí'i, ta kúu na míi sa'a xí'ín na noo ndí'i. Ta taa kí yo'ó noo tuti ndidaá ña ndé'ón kúu, dá tanda'ón ña ná ko'an noo ndin usa ve'e ño'o ñó'o chí kuendá Asia, noo kúu ñoo Éfeso, xí'ín ñoo Esmirna, xí'ín ñoo Pérgamo, xí'ín ñoo Tiatira, xí'ín ñoo Sardis, xí'ín ñoo Filadelfia xí'ín ñoo Laodicea —kaá na xí'ín.

¹² Dá tá ni nandió kooi ni sa nde'í, nde'á ndá yoo ká'an xí'ín, ta kúu ni xini ndíta usa candelero ni kava'a xí'ín oro, noo sá ndodó ña tóon. ¹³ Ta tein ndin usa candelero ñoo iin iin na kaa táto'on kaa na ni nduu taa ñayuu yó'o. Ta ndíxi na iin dá'on kani, ta xinoan nda sa'a ná, ta nákaa iin vatí oro yu'ú ndíká na. ¹⁴ Ta dini ná xí'ín idí dini ná kuxí kachian, ta ndé'an táto'on ndé'é yi'o, ta nduchí noó na kúu táto'on ki'o ño'ó ita.

¹⁵ Ta táto'on yé'e kaa kuaán ni dandúti ra, ki'o dión yé'e sa'a ná. Ta táto'on ki'o ní'i noó kua'an takuí kua'a, ki'o dión ní'i tachi ná. ¹⁶ Ta noo ndá'a xoo kuá'a na ñó'o usa tiño, ta yú'u ná tánee iin espada, ta ndi nduu xooan deen. Ta ndato yé'e noo ná táto'on ki'o ndato yé'e tá ndí deen.

¹⁷ Tá ni xini táto'on ki'o kaa na, kúu ni yaai nda noñó'o táto'on ki'o kuéi na ni xi'i. Dá ni chinóo na nda'á kuá'a na sataí, dá ni kaa na xí'ín:

—O sa yú'oon. Yu'u kúu na míi sa'a, ta yu'u kúu na noo ndí'i. ¹⁸ Ta kúu ta'anii na daá ió takí. Ni xi'ii, tído takí viti, ta daá kuií vá katakii. Dión ná koo. Ta míi yu'u kómíi nda'á kaa noo ñó'o na kúu ndii, ta kómí ta'ani yu'u choon noó ña kedaá xí'ín ñayuu, dá xí'i na. ¹⁹ Ta taa ndidaá ña ni xinon, ta taa ta'ani ndidaá ña kúu tiempo viti, xí'ín ña koo chí noo. ²⁰ Ná ko'in kasto'in xí'ón ndi dándaki ndin usa tiño, tá'an kirí ni xinon ñó'o noo ndá'a xoo kuá'i, xí'ín ndin usa candelero oro ñoo. Ndin usa tiño ñoo kúu ndin usa ángel kómí choon sata ndin usa ve'e ño'o ñó'o chí kuendá Asia, ta ndin usa candelero oro ni xinon ñoo kúu ndin usa ve'e ño'o ñoo.

Tánda'á Juan to'on ni ka'an Jesús kua'an noó na kúu kuendá na ndéi ñoo Éfeso

2 ¹ Taa ña ko'in ka'in xí'ón noo iin tuti, dá tanda'ón ña ná ko'an noo ángel kómí choon sata ñayuu kúu kuendá yu'u ndéi ñoo Éfeso, ta ka'on xí'ín ná: “Na ñó'o ndin usa tiño noo ndá'a xoo kuá'a, na xionoo tein ndin usa candelero oro ñoo kúu na kaá di'a xí'ín ndó: ² Sa ná'á vá yu'u ndidaá ña kée ndo'ó, ta ná'á ta'ani yu'u ña ndí'i ini ndo kéchóon ndó, ta ná'á ta'anii ña xí'o ndeé ini ndo noó tandó'ó ndó'o ndó. Ta ná'á ta'anii ña kékini ini ndo xiní ndo ñayuu káni. Ta xírndodó ndó taa kaá kúu apóstol, tído ko ta'ón ñaá kúu rá, ta kánda ini ndo ña kúu

rá ta to'ón. ³ Ta ndó'o nio ndo, ta xí'o ndeé iní ndo, ta ndí'i ini ndo kéchóon ndó noo yú'u sa'a ná kóni ndo yu'u, ta ko sá tuu ta'on ndó. ⁴ Tído ká'an kuachii noo ndo sa'a iin ná'a, chi ko kóni ka ndo yu'u táto'on ki'o ni sa kóni ndo yu'u nda míi sa'a. ⁵ Sa'a ñoo ndisaa ini ndo ndeí ni kuei ndó noó ña ko kóni ndo yu'u, ta nandikó iní ndo sa'a ná kée ndó dión. Ta nandió kuéi ndó kee ndó ña va'a táto'on ni sa kee ndó nda míi sa'a. Dá chi tá koó, dá kían saa yachii noo ndeí ndó, ta ditá vá yu'u candelero ndo noo íian. ⁶ Tído iin ná va'a kée ndó kían ná kékini ini ndo xiní ndo ña kée na kúu kuendá nicolaítas, ta ki'o dión ta'ani ndó'o yu'u xí'ín ná. ⁷ Ta na ío do'o, ná kueídó'o na ña ká'an na kúu Espíritu ii xí'ín iin rá iin ve'e ño'o ñó'o chí kuendá Asia. Ta noó na ni xi'o ndeé iní ni xinkuei nda noo ndí'i, noón kúu na ki'oi ña keí ná kui'i kána noo yíto, yiró xí'o ña kataki chíchí ñayuu. Ta yíto yó'o kúu ra iin me'í noo ndato kaa noo ío Ndios.”

Tánda'á Juan to'on ni ka'an Jesús kua'an noó na kúu kuendá na ndeí ñoo Esmirna

⁸ Ta taa ta'ani ña ko'in ka'in xí'ón noo iin ka tuti, dá tanda'ón ña ná ko'an noo ángel kómí choon satá ñayuu kuendá yu'u ndeí ñoo Esmirna, ta ka'on xí'ín ná: “Na kúu míi sa'a, na kúu noo ndí'i, na ni xi'i, ta ni natakí na kúu na kaá di'a xí'ín ndó: ⁹ Sa ná'á vá yu'u ndidaá ña kée ndo'ó, ta ná'á ta'ani yu'u táto'on kéndava'a ñayuu xí'ín ndó. Ta ná'á ta'ani yu'u táto'on ki'o kúnda'í ndo ñayuu yó'o, va'ará na kuiká vá kúu ndó noo Ndios. Ta ná'á ta'anii ña ká'an ndava'a na kaá kúu na Israel xí'ín ndó, tído ko ta'ón ñaá kúu ná, dá chi kúu ná iin tu'u ndíta xí'ín ña u'u. ¹⁰ O sa yu'ú ndo ndidaá ña vei ndo'o ndó. Ta kaá ta'ani yu'u xí'ín ndó ña ko'on ta'ani ña u'u taán dao ndo'ó ve'e kaa, dá kexíxian xí'ín ndó, ta uxí kuu kéndava'an xí'ín ndó. Kandita ndaa ndo xí'ín nda noo kuu ndo sa'í, dá kían ki'oi iin corona noo ndo, ña kúu ña kataki chíchí ndó. ¹¹ Ta na ío do'o, ná kueídó'o na ña ká'an na kúu Espíritu ii xí'ín iin rá iin ve'e ño'o ñó'o chí kuendá Asia. Ta noó na ni xi'o ndeé iní ni xinkuei nda noo ndí'i, noón kúu na o kúu ta'on ta'ándá kúu uu.”

Tánda'á Juan to'on ni ka'an Jesús kua'an noó na kúu kuendá na ndeí ñoo Pérgamo

¹² Ta taa ta'ani ña ko'in ka'in xí'ón noo iin ka tuti, dá tanda'ón ña ná ko'an noo ángel kómí choon satá ñayuu kuendá yu'u ndeí ñoo Pérgamo, ta ka'on xí'ín ná: “Na tánee espada yú'u, ña deen ndi nduú xoo, míi ná kúu na kaá di'a xí'ín ndó: ¹³ Sa ná'á vá yu'u ndidaá ña kée ndó, ta ná'á ta'ani yu'u ña ndeí ndó míi ñoo noo dándáki ña u'u. Tído ndíta toon ii vá ndó xí'ín yu'u, ta ko ní dánkoo ta'on ndó ña kándéé iní ndo yu'u, va'ará ni xini xí'ín noo ndo ni sa'ání ñayuu Antipas, tá'an ra sa kastó'on ndaa to'in noó ñayuu. Dión ni ndo'o ra ñoo ña u'u xa'an. ¹⁴ Tído ká'an

kuachi yu'u noo ndo sa'a dao ña'a, dá chi ñó'o dao na kúu kuendá Balaam tein ndo'ó. Ta sa ná'á vá ndó ña taa yó'o sa daná'a noo Balac ndi kee ra kexíxi ra xí'ín na ñoo Israel, sa'á ñoó ni ya'a na ni seí ná koño kítí, ña dóko ñayuu noo yoko ná, ta ni ya'a ta'ani na ni kee na kuachi xí'ín na ko kúu yíi ná, xí'ín na ko kúu ñadi'í na. ¹⁵ Ta ñó'o ta'ani na kúu kuendá nicolaítas tein ndó, ta kékini ini yu'u xiníi ña dána'a na. ¹⁶ Sa'á ñoó nandikó kíi ini ndo sa'á kuachi kée ndó, dá chi tá koó, yachi va saa yu'u noo ndéi ndó, dá ka'áníi ñayuu yó'o xí'ín espada tánee yú'í. ¹⁷ Ta na ió do'o, ná kueídó'o na ña ká'an na kúu Espíritu ii xí'ín iin rá iin ve'e ño'o ñó'o chí kuendá Asia. Ta noo na ni xi'o ndeé iní ni xinkuei nda noo ndí'i, ko'in kí'oi maná, ña ió de'é induú, keí ná, ta kí'o ta'anii iin yuu kuxí ló'o noo iin rá iin na, ta noo yuu ñoó kanda'a iin kuu saá. Ta ni iin tó'ón ta'on dao ka ñayuu o kána'á ndá kuu kíán, sava'a iin tó'ón na ni natiin ña kana'á.”

Tánda'á Juan to'on ni ka'an Jesús kua'an noo na kúu kuendá na ndéi ñoo Tiatira

¹⁸ Ta taa ña ko'in ka'in xí'ón noo iin ka tuti, dá tanda'ón ña ná ko'an noo ángel kómí choon satá ñayuu kúu kuendá yu'u ndéi ñoo Tiatira, ta ka'on xí'ín ná: “Na kúu de'e Ndios, na tóon nduchí nóo tát'on tóon ño'ó ita kéi, na yé'e sa'a tát'on kí'o yé'e kaa kuaán ni dandúti ra, noón kúu na kaá di'a xí'ín ndó: ¹⁹ Sa ná'á vá yu'u ndidaá ña kée ndó, ta ná'á ta'ani yu'u ña kóni ndo yu'u, ña kándéé iní ndo yu'u, ña xínkuáchí ndó noo yu'u, ña xí'o ndeé ini ndo noo ndidaá ña'a. Ta va'a ka ví kéchóon ndó noo yú'u viti o duú tá míi sa'a. ²⁰ Tído ká'an kuachi yu'u noo ndo sa'a dao ña'a, dá chi sónó ndó noo Jezabel, ña kúu profeta to'ón, ña kíán dána'an noo ndo. Ta sónó ta'ani ndó ña dánda'í ná'a yó'o ta xínkuáchí nooí, dá ya'a ra kee ra kuachi xí'ín na ko kúu ñadi'í ra. Ta dánda'í ta'anián ra, dá ya'a ra seí ra koño kítí, kirí dóko ñayuu noo yoko. ²¹ Ta ni sonóí ña kíán ná nandikó iníán, tído ko kóni ta'an vaán nandikó iníán, chi kée ii váán kuachi xí'ín taa ko kúu yíián. ²² Sa'á ñoó ko'in dánkao ñaái noo xíto kandu'an ndo'án kue'e, ta kí'o ta'anii ña ndo'o níto ndidaá ra kée kuachi xí'án tá ná o nándikó iní ra sa'á kuachi kée ra xí'án. ²³ Ta ko'in dárkue'i ndidaá na ndíta xí'án, dá kuu na. Ta ndidaá ñayuu kúu kuendá yu'u ná kanda'a ini ña yu'u kúu na kátóni ini ndi nákani ini ñayuu xí'ín ña kátóo na kee na, ta ná chiya'avii iin rá iin ñayuu tát'on kí'o kaa choon ni kee na.

²⁴ “Tído dao ka ndo'ó ndéi ñoo Tiatira, ko tái ta'on ndó sa'á ña kée na kúu kuendá Jezabel, ta ko kándísa ndó ña chínaní ñayuu ña ndichí xí'o ña u'u. Sa'á ñoó ko sa'ándá kai ni iin ka choon noo ndo. ²⁵ Sava'a ña kóni kíán koo ini ndo kuita toon ndó xí'ín ña kándéé iní ndo yu'u nda ná kasandaá kuu nandió koo tukui. ²⁶ Ta noo na ni xi'o ndeé iní ni xinkuei nda noo ndí'i, tá'an na sa kee ña kóni yu'u nda noo ndí'i kuií,

noón kúú nā ko'on yu'u ki'oi choon noo, dá dándáki na iin rá iin ñoo ñayuu yó'o. ²⁷ Ta xí'ín vara kaa dándáki na ñoo ñoo, ta ko'on nā dákuáchi naan táto'on ki'o cháchi kidi ñó'o, chi ki'oi choon noo ná táto'on ni xi'o tatái choon noo mií, ²⁸ ta ko'in ki'oi iin kimi ndato tóon na'a noo ná. ²⁹ Sa'á ñoo, nā ió do'o, ná kueídó'o na ña ká'an nā kúú Espíritu ii xí'ín iin rá iin ve'e ño'o ñó'o chí kuendá Asia.”

Tánda'á Juan to'on ni ka'an Jesús kua'an noo nā kúú kuendá nā ndéi ñoo Sardis

3 ¹ 'Ta taa ta'ani ña ko'in ka'in xí'ón noo iin ka tuti, dá tanda'ón ña ná ko'an noo ángel kómí choon satá ñayuu kúú kuendá yu'u ndéi ñoo Sardis, ta ka'on xí'ín ná: “Nā kómí ndin usa espíritu Ndios, nā ñó'o ndin usa tiño noo ndá'a, noón kúú nā kaá di'a xí'ín ndó: Sa ná'á vá yu'u ndidaá ña kée ndó, ta ná'á ta'anii ña kaá ñayuu ña takí ndo xí'ín ña kándisa ndó, tído ko takí ta'on ndó noo yú'u. ² Sa'á ñoo kaño'o ini ndo, ta kanda ndo ña kua'an naá noo ndo, dá ná o naá chíchían, dá chi ni kanda inii ña ko kéndísá'ano ta'on ka ndo noo Ndios táto'on ki'o kóni nā kee ndó. ³ Kua'an ndo ndisaa ini ndo ndá kían ni natiin ndó, ta ndá kían ni seídó'o ndó, ta kua'an ndo kee ndó ña, ta nandikó iní ndo, chi ni ya'a ndó noo Ndios. Kande nduu ndo, dá chi tá koó, dá kían saai noo ndéi ndó táto'on kée iin ta ku'íná, ta natiin ndakánai ndo'ó. ⁴ Tído ndéi ta'ani dao ñayuu ñoo Sardis xaan, ta ko ní dáyakō ta'on na dá'on ná, chi ko ní dáyakō nā mií ná xí'ín kuáchi. Sa'á ñoo kandii na dá'on kuxí kanoo na xí'ín yu'u, dá chi ió íchi ná koo na dión sa'á ña ni sa ndaa nā mií ná. ⁵ Ta ndi ndaa nā ni xi'o ndeé iní ni xinkuei nda noo ndí'i, noón kúú nā nandixi dá'on kuxí, ta o dándóo ta'on yu'u kuú ná noo libro noo kándodó kuú nā ni'í ña kataki chíchí, ta nakoni yu'u nā, ña kúú ná ñayuu mií, noo tatái Ndios xí'ín noo ángel kéchóon noo ná. ⁶ Nā ió do'o, ná kueídó'o na ña ká'an nā kúú Espíritu ii xí'ín iin rá iin ve'e ño'o ñó'o chí kuendá Asia.”

Tánda'á Juan to'on ni ka'an Jesús kua'an noo nā kúú kuendá nā ndéi ñoo Filadelfia

⁷ 'Ta taa ta'ani ña ko'in ka'in xí'ón noo iin ka tuti, dá tanda'ón ña ko'an noo ángel kómí choon satá nā kúú kuendá yu'u ndéi ñoo Filadelfia, ta kaaon xí'ín ná: “Di'a ká'an nā ii, nā kúú nā ndaa, nā kómí nda'á kaa rey David, nā sónó, ta ko iin ta'on kandeé kadi, nā sadí, ta ko iin ta'on kandeé konó, noón kúú nā kaá di'a xí'ín ndó: ⁸ Ta sa ná'á vá yu'u ndidaá ña kée ndó. Sa'á ñoo kaái xí'ín ndó ña sa ni nono vá yé'é noo ndo, ta ko iin ta'on kandeé kadi ña. Ná'í ña cháá vá ndakí ndo, tído ndíta ndaa ndo xí'ín to'in, ta ko ní ndata ndo sa'a yú'u. ⁹ Kana'á ndó ña ko'in nakí'oi nā kúú kuendá ña u'u noo ndá'a ndo, tá'an nā kaá ña kúú ná nā Israel, tído ko ta'ón ñaá kúú ná, ñayuu to'ón vá kúú ná. Ta tanda'í

na kasaa na kaku_{ita} xi_{ti} ná no_o sa'a ndo, ta nakoni na ña mi_{an} ndaa kú'u ini_i sa'a ndo. ¹⁰ Ni kee ndó choon ni sa'andai noo ndo, chi xi'o ndeé ini ndo ndíta toon ndó xi'in yu'u, sa'a ño_o kandaa va'a mií yu'u ndo'ó no_o tandó'ó kini vei no_o ñayuu ndéi ñayuu yó'o, chi xi'in tandó'ó yó'o ko'in korndodói ndidaá ñayuu ndéi noñ'o. ¹¹ Yachi vá sa_i. Kua'án ndo tiin toon ndó ña ndaa kándisa ndó, dá kían ná dá'a ni kandeé dao ka na naki'in na corona kánian ni'i ndo. ¹² Ta na ni xi'o ndeé ini ni xinkuei nda noo ndí'i, na yó'o kúu na ko'on yu'u chikatai kakuu na tát'on iin di'in kandita katuu ve'e ño'o Ndios, ta ni iin ku_u ta'ón o kándoo na sata vé'e. Ta sata mií ná ko'in taai ku_u Ndios xi'in ku_u ñoo Ndios, ña kúu ñoo Jerusalén saá, ña kían konoo vei nda induú noo ió Ndios, ta taa ta'anii ku_u saá kakomí mií sata ná. ¹³ Na ió do'o, ná kueídó'o na ña ká'an na kúu Espíritu ii xi'in iin rá iin ve'e ño'o ñó'o chí kuendá Asia."

Tánda'á Juan to'on ni ka'an Jesús kua'an noo na kúu kuendá na ndéi ñoo Laodicea

¹⁴ "Ta taa ta'ani ña ko'in ka'in xi'on noo iin ka tuti, dá tanda'on ña ná ko'an noo ángel kómí choon satá ñayuu kúu kuendá yu'u ndéi ñoo Laodicea, ta ko'on xi'in ná: "Mií na dáxinkoo to'on Ndios, noón kúu na xi'o ndaa kuendá sa'a ña ni xini na, ta ká'an na ndino'o ña ndaa, ta kúu ná yo'o ndidaá ña'a ni kava'a ió ñayuu yó'o ni kee Ndios, na yó'o kúu na kaá di'a xi'in ndó: ¹⁵ Sa ná'a vá yu'u ndidaá ña kée ndó, ta ko víxi ndó xi'in to'in, ta ni ko í'íní ndó xi'án. Va'a kaan iin íchi ná koo víxi ndó, o iin íchi ná koo i'íní ndó xi'án. ¹⁶ Dá chi sa'a ña vaá óon yí'i yóko ndó xi'in to'in, sa'a ño_o ko'in ndusai ndo'ó, chi ko víxi ndó, ta ni ko í'íní ndó xi'án. ¹⁷ Dión kaái xi'in ndó, dá chi kaá ndo ña kúu ndó na kuiká, ña ni kandeé ndó ni kekuiká ndó mií ndó, ta ni iin ña'a ko kámani noo ndo, kaá ndo. Tído ko xi'o ta'on ndó kuendá ña kúu ndó na ndéi ndava'a, na noo ndó'o, na kúnda'í, na kó'o noo, na ndaa vichí. ¹⁸ Sa'a ño_o ká'an ni'inii yu'u noo ndo ña kuiin ndó oro ndino'o, ña ni xirndodó ná xi'in ñó'o kéi, noo yú'u, dá kakuu ndisa ndó na kuiká, ta kuiin ta'ani ndó dá'on kuxí noo yú'u kandixi ndó, dá dáda'i ndó mií ndó, dá kían ná dá'a ni kaka'an noo ndo ña ndaa vichí ndó, ta taán ndo tata nduchí nóo ndo, dá ná natuu cháa noo ndo. ¹⁹ Dá chi dánani va yu'u na kú'u ini yu'u sa'a, ta ndaa yú'u vá yu'u na. Sa'a ño_o kua'án ndo ndino'o ini ndo ndiko ndo ña va'a, ta nandikó ini ndo, chi ni ya'a ndó noo yú'u. ²⁰ Yó'o íin dákásái yé'é ndó, ta ndi ndaa ndo ni seídó'o noo ká'in, ta ni sonó ndó yé'é ndó, dá kían ku'i ve'e ndó, ta kadíni yu'u xi'in ndó, ta ndo'ó kadíni xi'in yu'u. ²¹ Ta no_o na ni xi'o ndeé ini ni xinkuei nda noo ndí'i, ko'in ki'oi ña kían kandeí dáó ná xi'in yu'u noo iói dándákii, tát'on ki'o ni kandeé yu'u ni xinkooi, dá ni sa ko nduúí xi'in tatái Ndios noo ió na dándáki na. ²² Na ió do'o, ná kueídó'o na ña ká'an na kúu Espíritu ii xi'in iin rá iin ve'e ño'o ñó'o chí kuendá Asia."

Kéká'ano na ndéi induú tatá Ndios

4 ¹ Tá n̄i ndi'i, dá n̄i xinī n̄i nonō iin yé'é chí induú, ta tachi, ña n̄i seido'i míi sa'a, ña k̄ian ní'i t̄ato'on k̄i'o n̄i'i ká'an trompeta, ñoó n̄i kaa tuku xí'ín:

—Kua'an kaa, nakíi, dá ná ko'in dána'i nooon ndidaá ña vei koo cháa ka chí noo —kaáan.

² Ta kúu iin kuití vá n̄i nakutíi xí'ín Espiritu īi Ndios. Ta chí induú n̄i xinī iin iin téi ta né'e choon, ta noo téi ñoó ió iin na dándáki. ³ T̄ato'on ndé'é yuu ndato naní jaspe xí'ín yuu ndato naní cornalina, k̄i'o dión ndé'é ñíi na ió dándáki ñoó. Ta iin iin chiyangí noo ió na, ta chiyangí ñoó ndé'é t̄ato'on k̄i'o ndé'é yuu kuíi ndato naní esmeralda. ⁴ Ta noo iin téi noo ió na dándáki ñoó n̄i kaō noo oko komi téi noo ndéi oko komi ta sá'ano, n̄i xini yu'u, ta ndíxi ra dá'on kuxí kachi, ta kándodó corona oro diní rá. ⁵ Ta téi iin me'í ñoó kánkuei tasa, ta ní'i xido kúu ka'ándí, ta tái ndátó'on kua'á ñayuu. Ta sa'a míi téi yó'o ndíta us̄a ñó'o tooan, ta ña yó'o kúu ndin us̄a espíritu Ndios.

⁶ Ta noo iin téi yó'o ndé'é t̄ato'on ndé'é taño'o dión t̄ato'on dión yuu tatá, ta yé'e ra t̄ato'on yé'e iin yuu dión ndato naní cristal. Ta d̄in téi yó'o ndíta komi ña'a takí, ta iin ní ñíián tándaa nduchí nóoan, chi tándaaan chí sataán, chí nooan. ⁷ Tá'an ña míi noo ñoó káa t̄ato'on káa iin ndika'a, ta ña kúu ūu ñoó káa t̄ato'on káa iin chikerró, ta ña kúu oni ñoó káa nooan t̄ato'on káa noo iin ta, ta ña kúu komi ñoó káa t̄ato'on káa iin kirí ya'a tánee noo táchi. ⁸ Ta iño kúu ndixi iin rá iin ndin komi ña takí ñoó, ta iin níi ndixián tándaa nduchí nóoan. Ta ko sá tuu ta'an vaan nduú ni ñoó ña k̄ian ká'an di'a:

N̄a īi, na īi, na īi kúu Ndios,

na kúu sato'o yo, ta míi ná kúu Ndios, na kándéé kée ndidaá ña'a.

Ta míi ná n̄i sa kuu na, ta míi ná kúu ná, ta míi ná kúu na kasaa.

⁹ Ta daá kéká'ano ndin komi ña takí ñoó na ió dándáki noo téi ñoó, ta xí'oan ñañó'o noo ná, ta náki'oan ndivé'e noo na daá takí kuií. Ta iin rá iin ta'ándá ká'an dión, ¹⁰ dá sa kuíta xití ndin oko komi ta sá'ano ñoó noo sá'a na ió noo téi ñoó, ta kéká'ano ra na daá takí kuií, ta taó ra corona kándodó diní rá chindei ra noo sá'a ná, ta kaá ra xí'ín ná:

¹¹ Sato'o ndu, ió íchi ní ña k̄ian keká'ano na míi ní,

ñā k̄ian k̄i'o na ñañó'o noo ní, ña k̄ian natiin ní ndidaá tá'an choon, dá chi míi ní n̄i kava'a ndidaá tá'an ña'a.

Ta sa'á ña dión n̄i koni míi ní, sa'á ñoó ió ndidaá tá'an ña'a,

ta sa'á ñoó ta'ani n̄i ndaki ndidaá tá'an ña'a n̄i kee ní.

Ni'i Jesús, na kúu léko, iin tuti ndadí xí'ín sello

5 ¹ Ta n̄i xini ta'anii kánóo iin tuti n̄i natuu noo ndá'a xoo kuá'a na ió noo téi ñoó, ta ndi nduú xooan káa to'on, ta ndadí yú'an xí'ín

usa sello. ² Ta kúú nī xini ta'anii iin ángel ndakí nda'o, ta nī'i nda'o ká'an na:

—¿Ndá yoo ió íchi ña ka'anda na ndin usa sello, ta konó ná tuti yó'o? —kaá na.

³ Ta ni iin tó'ón na ndéi induú, ta ni na ndéi noñó'o, ta ni na ndéi tixi ñó'o ko ní kándeé konóán, ta ni ko ní kándeé ná ka'i naan. ⁴ Sa'á ñoó nī ndei'i nda'o yu'u, dá chi ko ní nání'i ná ni iin tó'ón na ió íchi ña kían konó ná tuti ñoó, ni ña ka'i na ña, ni ña kande'é náan.

⁵ Dá nī kaa iin ta sá'ano ñoó xí'ín yu'u:

—O sa kuákón, dá chi na kúú ndika'a nī kii tein na ve'e Judá, na nī kii tein na ve'e David, na yó'o kúú na nī kándeé noo ndidaá ña'a, sa'á ñoó ió íchi ná konó ná tuti káa, ta ka'anda na ndin usa sello ndadí yú'an.

⁶ Dá nī sa nde'í, ta yati noo iin téi ñoó, xí'ín tein ndin komi ña takí ñoó, ta me'í ta sá'ano ndéi ñoó nī xini iin iin na kúú léko. Ta káa na táto'on káa kirí nī sa'ání ná. Ta usa kúú ndíki ná, ta usa ta'ani kúú nduchí nóo na, ta ña yó'o kúú ndin usa Espiritu Ndios nī tanda'á ná kua'an iin ní kúú ñayuu. ⁷ Dá nī tatau yati na kúú léko ñoó nī tiin na tuti kánóo noo ndá'a xoo kuá'a na ió dándáki noo téi ñoó.

⁸ Tá nī ndi'i nī tiin na libro ñoó, dá nī sa kuíta xití ndin komi ña takí ñoó xí'ín ndin oko komi ta sá'ano ñoó noo na kúú léko ñoó. Ta ndidaá vá rá né'e arpa xí'ín copa oro nī chití ñó'o dusa chíño'ómá, ta ña yó'o kúú to'on xíka ta'i ñayuu Ndios noo mií ná. ⁹ Ta xíta ra iin yaa saá ká'an di'a:

Ió íchi ní natiin ní libro, ta ka'anda ní selloan,
chi nī sa'ání rá mií ní, ta xí'ín nií mií ní nī chiya'i ní sa'a ndú'u,
dá nī nduu ndu ñayuu Ndios.

Chi nī kee ní dión xí'ín ñayuu nī kii iin rá iin tata, xí'ín na ká'an iin rá iin yú'u, xí'ín na ndéi iin rá iin ñoo, xí'ín na ndéi iin rá iin nación.

¹⁰ Ta nī kee ní iin rá iin ndu'u kakuu ndu rey xí'ín duti noo Ndios, ta kane'e ndu choon satá ñayuu ndéi noñó'o.

¹¹ Nī ndi'i, dá nī xini nī kao noo kuá'á nda'o ángel noo ió Ndios dándáki na, xí'ín noo ndéi ndin komi ña takí ñoó, xí'ín noo ndéi ta sá'ano ñoó. Ta kuá'á nda'o mil millón kúú ángel nī kao noo ndíta ñoó.

¹² Ta nī seido'i nī'i nī ka'an na:

Ió íchi na kúú léko, na nī sa'ání rá,
ña kían natiin na ndidaá tá'an choon, xí'ín ndidaá tá'an ña kuiká,
xí'ín ndidaá tá'an ña ndichí, xí'ín ndidaá tá'an ndée,
xí'ín ndidaá tá'an ñañó'ó, xí'ín ndidaá tá'an to'on ndato keká'ano ñayuu na.

¹³ Ta nī seido'i nī ka'an ndidaá ña nī kava'a Ndios, ña ndéi induú, xí'ín ña ndéi noñó'o xí'ín ña ñó'o tixi ñó'o, xí'ín ña ñó'o ini taño'o, xí'ín ndidaá ka ña'a nī kava'a Ndios, ta kaáan di'a:

Ná ió dándáki noo téi káa xí'ín ná kúú léko káa kúú ná kánian natiin to'on xí'o ñayuu keká'ano ñáá ná, ta ná natiin na ñañó'ó, xí'ín to'on ndato, xí'ín ndée, ta daá kuití dión ná koo.

¹⁴ Ta di'a ká'an ndin komi ña takí ñoó:

—Dión ná koo.

Ta ni sa kuita xití ndin oko komi ta sá'ano ñoó, ta ni xino taan ra nda noñó'o ndáño'o ra na daá takí kuií.

Di'a ni kuu tá ni sa'anda Jesús sello ñoó

6 ¹ Ta ni xini ni sa'anda na kúú léko ñoó iin sello ndadí yú'u libro ñoó. Dá ni seido'i ni ka'an iin ña takí ñoó, ta ni'i nda'o ni ka'an. Táto'on ki'o ni'i káyu'ú dai, ki'o dión ni'i ni ka'an, ta kaáan:

—Nakíi.

² Tá ni ndi'i ni ka'an dión, dá ni xini ni keta iin kuéi kuxí vei rí, ta kánóo iin taa sata ri, ta né'e ra iin kúxi. Ta ni natiin ra iin corona, ta kúú rá iin taa ni kandeé, ta kua'an ra kandeé rá cháa ka.

³ Tá ni ndi'i, dá ni sa'anda na sello kúú uu, dá ni seido'i ni ka'an iin ka ña takí ñoó:

—Nakíi.

⁴ Dá ni keta iin ka kuéi vei rí, ta kúú rí iin kuéi kua'á. Ta kánóo iin taa sata ri, ta ni natiin ra choon ña kían ditá rá ña ndéi va'a ñayuu ndéi ñayuu, dá kasá'á ka'ání tá'an iin rá iin na. Ta ni ni'i rá iin espada ká'ano.

⁵ Tá ni ndi'i, dá ni sa'anda na sello kúú oni, dá ni seido'i ni ka'an ña takí kúú oni ñoó:

—Nakíi.

Dá ni xini iin iin kuéi ndei'í, ta kánóo iin taa sata ri, ta né'e ra noo chíki'ó ra ndi ki'o vee ña'a. ⁶ Dá ni seidó'i tachí iin na ni ka'an tein ndin komi ña takí ñoó, ta kaáan di'a:

—Iin kilo va tirió ni'i ná sa'a choon kée na iin níi kuu, ta oni kilo va cebada ni'i ná sa'a choon kée na iin níi kuu. Tído ná dá'a ni dándáa yo'ó ya'i sití xí'ín vino.

⁷ Tá ni ndi'i, dá ni sa'anda na sello kúú komi, dá ni seido'i ni ka'an ña takí kúú noo ndí'i ñoó:

—Nakíi.

⁸ Dá ni xini vei iin kuéi xi'i kuaan, ta kánóo iin taa sata ri, ta naní rá Kue'e Deen Sa'ání Ndi. Ta sata mií rá vei iin ka ra naní Yái Ndi. Ta ni natiin ra choon ña kían ka'ání rá iin ñayuu noo iin iin komi ná. Dao na ka'ání rá xí'ín espada, dao ka na ka'ání rá xí'ín doko, dao ka na ka'ání rá xí'ín kue'e, ta dao ka na ka'ání rá xí'ín kirí deen ndéi noñó'o.

⁹ Tá ni ndi'i, dá ni sa'anda na sello kúú o'on, dá ni xini ña tixi noo náa ñoó ño'o níno ndidaá na ni xi'i sa'á ña kándísa na to'on Ndios xí'ín sa'á

ña sa ká'an na ña ndaa sa'a Jesús noó ñayuu. ¹⁰ Ta káyu'ú ndidaá na yó'o, ta kaá na xí'in Ndios:

—Mií ní kúú na né'e choon ká'ano cháá ka, mií ní kuu na ii, na ndaa, sa'á ñoó, ¿ndá oon keyíko ní sa'a ndú'u, dá naki'in ya'i ní sa'á nii ndú'u, kirá ni sata na ndéi noñó'o? —kaá na.

¹¹ Dá ni ni'i ná dá'on kuxí kandixi na, ta ni ta'anda choon noo ná ña ná nani'i ndée ná lú'u ka tiempo nda ná kuu ndidaá na kánian kuu sa'á ña kándísa na to'on Ndios, na kúú ñayuu xínkuáchí noo Ndios táto'on ni kee mií ná.

¹² Tá ni ndi'i, dá ni xini ni sa'anda na sello kúú iño ñoó. Ta kúú ni'i nda'o ni taan, ta ni ndunde'i'í ndindii táto'on k'i'o ndei'í dá'on ndíxi na tá xí'i ndii noo ná, ta yoo ni ndukua'á ni. ¹³ Ta nda noñó'o yó'o ni kuei tiño ñó'o induú, táto'on k'i'o kuéi tiño'ó nda noñó'o kée tachi. ¹⁴ Ta ni natuu induú táto'on k'i'o natuu iin yúu tá ko xínño'ó ka naán. Ta ndidaá yúku ndíta noñó'o, ta ndidaá yúku ndíta ini taño'o ni nadaon ña, ta ko ndíta kaan xoo noó ni sa nditaan. ¹⁵ Ta ni taxí tá'an ndidaá rey ndéi noñó'o, xí'in ndidaá na ndáya'i, xí'in ndidaá na kuiká, xí'in ndidaá ta dándáki soldado, xí'in ndidaá na ná'ano, xí'in ndidaá na ñó'o tixi ndá'a iin sato'o, xí'in ndidaá na koó sato'o, ta ni chide'é ná mií ná ini káo ná'ano, xí'in tixi yuu ná'ano tánee ndika yúku, ¹⁶ dá ni kaa na xí'in yúku ñoó, xí'in káo ñoó:

—Kuei ndó kodó ndó sata ndú'u, ta dáda'i ndó ndu'u noó na ió dándáki noo téi káa, xí'in noó na kúú léko káa, chi xido ini na xiní na ndu'u, ¹⁷ chi viti kían sa ni kasandaá kuu xido nda'o ini na, ¿ta ndá yoo ví k'i'o ndeé iní kuita noo ná?

Karndaa sello taan iin ciento uu diko komi mil na Israel

7 ¹ Tá ni ndi'i, dá ni xini ndíta komi ángel ndin komi xoo tachi noñó'o yó'o. Ta ndin komi ángel yó'o ndíta chítuu tachi, dá ná o kána kaan noñó'o yó'o, ni noó taño'o, ni noo ni iin yíto. ² Ta ni xini ta'anii iin ka ángel koka veí chí xoo noo xíno ndindii, ta né'e na sello Ndios takí. Dá ni'i nda'o ni kayu'ú ná noo ndin komi ángel, na ni natiin choon ña kían kendava'a na xí'in noñó'o yó'o, xí'in taño'o. ³ Ña yó'o ni kayu'ú ángel ñoó:

—O sa kéndava'a ndó xí'in noñó'o xaan, ni taño'o xaan, ni yíto xaan xían nani ko ñá'a kani ndu sello taan na xínkuáchí noo Ndios yo.

⁴ Ta ni seídó'o ta'ani yu'u ndidaá kúú na ni ni'i sello ñoó. Ta kúú ná iin ciento uu diko komi mil na ñoo Israel, ta ni kii na tixi ndin uxí uu de'e taa naní Israel. ⁵ Dá chi tein na ve'e Judá uxí uu mil na ni ñani sello, ta tein na ve'e Rubén uxí uu ta'ani mil na ni ñani sello, ta tein na ve'e Gad, uxí uu ta'ani mil na ni ñani sello, ⁶ ta tein na ve'e Aser uxí uu ta'ani mil na ni ñani sello, ta tein na ve'e Neftalí uxí uu ta'ani mil na ni ñani sello, ta tein na ve'e Manasés uxí uu ta'ani mil na ni ñani sello, ⁷ ta tein na

ve'e Simeón uxí uų ta'ani mil na nĭ ñani sello, ta tein na ve'e Leví uxí uų ta'ani mil na nĭ ñani sello, ta tein na ve'e Isacar uxí uų ta'ani mil na nĭ ñani sello, ⁸ ta tein na ve'e Zabulón uxí uų ta'ani mil na nĭ ñani sello, ta tein na ve'e José uxí uų ta'ani mil na nĭ ñani sello, ta tein na ve'e Benjamín uxí uų ta'ani mil na nĭ ñani sello.

Ndíxi kuxí kuą'á nda'o mil ñayuu, ta ndíta na kéká'ano na Ndios

⁹ Tá nĭ ndi'i, dá nĭ xinij ndíta kuą'á nda'o ñayuu, ta ko ĩn ta'on kandeé ka'i na, dá chí kúú ná ñayuu nĭ kii ndidaá nación, na nĭ kii ndidaá ñoo kuálí, xí'ín ñoo ná'ano, na ká'an iin rá iin yú'u. Ta na yó'o kúú na ndíta noó na ío dándáki noo téi ñoo, xí'ín noó na kúú léko ñoo. Ta ndíxi kuxí na, ta tánee ñoo ndá'a ná. ¹⁰ Ta ña yó'o káyu'ú ná ndíta na:

Iin tó'on na kándéé dákaki ñaá kúú Ndios yo, na ío dándáki noo téi káa,
xí'ín na kúú léko káa.

¹¹ Ta nĭ kaq noo ndidaá tá'an ángel, xí'ín ndidaá ta sá'ano ñoo, xí'ín ndin komĭ ña takí ñoo ndíta na sa'a téi noo ío Ndios dándáki na. Ta nĭ sa kuĭta xití ná noo téi ñoo, ta nĭ kasá'á ná ndáño'o na Ndios, ¹² ta kaá na:

Dión ná koo, tatá Ndios.

Ná natiin ní to'on va'a, xí'ín to'on ndato,
xí'ín ña ndichí, xí'ín ndivé'e, xí'ín ñañó'ó,
xí'ín ndidaá choon, xí'ín ndée viti,
ta daá kuití dión ná koo.

¹³ Dá nĭ kaa iin ta sá'ano ñoo xí'ín yu'u:

—¿Ndá yoo kúú na ndíxi dá'on kuxí káa, ta ndeí nĭ kii na káa?

¹⁴ Dá nĭ kaaĭ xí'ín rá:

—Mií ní ná'á, tatá.

Dá nĭ kaa ra xí'ín:

—Na káa kúú na nĭ kankuei nĭ kii tein tandó'ó kini. Ta nĭ nakata na dá'on ná xí'ín nij na kúú léko, dá nĭ ndukuxí kachián. ¹⁵ Sa'á ñoo ndíta na noo ío Ndios dándáki na, ta nduú ñoo xínkuáchí ná noo ná ini ve'e ño'o na. Sa'á ñoo mií Ndios, na ío dándáki noo téi káa, kúú na koo xí'ín ná, ta kandaka va'a ñaá ná. ¹⁶ Ta o kixi ka ña kuiko na, ta ni o íchi ka na takuíí, ta ni o ndíi ka na kee ndindii, ta ni o koo í'íní ka koni na, ¹⁷ dá chí mií vá na kúú léko ĩn me'í noo na ío dándáki káa kandaka na ñayuu yó'o, ta kandaka ñaá ná ko'on na ko'o na noo kána ndita takuíí, kirá xí'o ña kataki chíchí yó. Ta nadáyaa mií Ndios ndidaá ndírnoo ná —kaá ta sá'ano ñoo xí'ín.

Di'a nĭ kuu tá nĭ sa'anda Jesús sello kúú usą

8 ¹ Tá nĭ ndi'i nĭ sa'anda na sello kúú usą ñoo, ta kúú tádi óon nĭ kuu induú noo ío Ndios táto'on tixi dao hora. ² Ndi'i, dá kúú nĭ

xinii ndíta usa ángel noo ió Ndios, ta iin rá iin na ni ni'i iin trompeta.
³ Dá ni kasáa iin ka ángel, ta ni sa kuíin na noo náa, ta né'e na iin copa oro noo kéi dusa ni saa na. Ta ni ni'i ná kua'á nda'o dusa, dá dákí'in tá'an na ña xí'in ña xíka ñayuu Ndios noo mií ná, dá kei ña noo náa oro ñoó, ña iin noo na ió dándáki ñoó. ⁴ Ta ini copa né'e ángel yó'o kána ño'oma dusa xí'in ña xíka ñayuu Ndios noo ná kokaan kua'an noo ió mií Ndios. ⁵ Tá ni ndi'i, dá ni dakúti ná copa yó'o xí'in ño'o kéi noo náa ñoó. Ta nda induú ni dakána na ña nda noñó'o, ta kúu ni ka'andi, ta tái ká'an ñayuu, kúu ni sa kuíta tasa, ta kúu ni'i nda'o ni taan.

Di'a ni kuu tá ni tuu ángel ñoó usa trompeta

⁶ Ta ndin usa ángel ñoó ni nakuíta nduu xí'in usa trompeta ñoó, ta kua'an na tuu na ró.

⁷ Tá ni tuu ángel mií noo ñoó trompeta na, kúu ni koon ñíni xí'in ño'o kéi né'e tá'an xí'in ni nda noñó'o. Ná keeá kuendá ña oni ta'ándá kúu yíto kaa noñó'o, ta iin ta'ándá ra ni kei, ta uu ta'ándá ra ko ní kéi. Ta ni kei ndi'i yukú kuíi.

⁸ Ta ni tuu ángel kúu uu ñoó trompeta na. Ta táto'on ki'o kaa iin yúku ñó'o kéi ita, dión kaa ña ni kankao noo taño'o. Ta iin ta'ándá noo oni ta'ándá taño'o ñoó ni nduu ni. ⁹ Ta iin ta'ándá noo oni ta'ándá kirí ñó'o ini taño'o ni xi'i, ta iin ta'ándá noo oni ta'ándá barco ni naá.

¹⁰ Ta ni tuu ángel kúu oni ñoó trompeta na. Ta nda induú ni kankao iin tiñoo kéi ita nda noñó'o, ta kéi ri táto'on ki'o kéi iin tirño'o. Ta ni kankao rí noo iin ta'ándá noo oni ta'ándá yuta, xí'in noo iin ta'ándá noo oni ta'ándá noo kána takuíi. ¹¹ Ta tiñoo yó'o kúu rí naní Ova. Ta iin ta'ándá noo oni ta'ándá takuíi ño'o noñó'o yó'o ni nduu ova. Ta kúu kua'á nda'o ñayuu ni xi'i ni kee takuíi ñoó, dá chi ni nduu ova ra.

¹² Dá ni tuu ángel kúu komi ñoó trompeta na, ta kúu ni nda'o va iin tá'i ndindii, ta tóon i i v a uu tá'i ña. Ta dión ta'ani ni ndo'o yoo xí'in tiñoo, chi ni nda'o ta'ani iin tá'i rí. Sa'á ñoó ni nakuíin naá iin ta'ándá nduu noo oni ta'ándáan, ta dión ta'ani ni kuu sakuaá.

¹³ Dá ni sa nde'í, ta kúu ni xinii iin ángel tánee na xionoo na nda me'í induú, ta ni seídó'i ña ni'i ni kayu'ú ná:

—iNda'í kúu ví na ndéi noñó'o! iNda'í kúu ví ná! iNdeé ví nda'í ndo'o na tá ná tuu ndin oni ka ángel yó'o trompeta na!

9 ¹ Tá ni tuu ángel kúu o'on ñoó trompeta na, dá ni xinii iin tiñoo ni yaa nda induú, ta ni xino ri nda noñó'o, ta ni natiin rí nda'á kaa ña sónó yú'u yái konó, ña koó noo sá tuu. ² Dá ni sonó rí yú'u yái ñoó, ta kúu ni kankuei ño'oma koka kua'an induú táto'on ki'o kána ño'oma yú'u iin xito ká'ano. Ta kúu ni da'i va noo ndindii ni kee ño'oma ñoó, chi iin ní ni naka'ani ña. ³ Ta tein ño'oma ñoó ni kankuei tika kanoo rí iin ní kúu noñó'o. Ta ni ni'i ri choon ña kían kee rí táto'on ki'o kée tidó'oma ndéi noñó'o. ⁴ Ta ni ta'anda choon noo ri ña ná dá'a ni

kendava'a rí xí'ín ita, ni yuku kuí, ni yíto káa noñó'o. Sava'a ni ni'i ri choon ña kendava'a rí xí'ín ñayuu koó sello Ndios tándaa taan. ⁵ Ta ko ní ta'anda ta'on choon noo ri ña kían ka'ání ri ñayuu. Sava'a choon ni ni'i ri kían kendava'a rí xí'ín ná o'on toon yoo, ta dár'u'u ñaá rí táto'on k'i'o kée iin tidó'oma dár'u'u ri ñayuu xí'ín íon ndó'o ri. ⁶ Ta katoó ñayuu kuu na daá ñóó, tído o kuú ta'on na. Ta va'ará nda'í ná ka'án ná kuu na, tído o kuú ta'on na.

⁷ Ta táto'on ndáa kuéi, kirí sa ió nduu kandodó ra naá, k'i'o dión ndáa tika ñóó. Ta táto'on k'i'o ndáa corona oro, k'i'o dión ndáa ña kandodó diní ri. Ta táto'on k'i'o ndáa noó ñayuu, k'i'o dión ndáa noo ri. ⁸ Ta táto'on k'i'o nání idí diní na ñá'a, k'i'o dión nání idí diní ri. Ta táto'on k'i'o ndáa no'o ndika'a, k'i'o dión ndáa no'o rí. ⁹ Táto'on iin ka kían ndadí yu'ú ndíká ri. Táto'on k'i'o ní'i xido taxi tá'an kua'a kuéi ño'o carreta kua'an ri xí'ín ta kua'an naá, k'i'o dión ní'i xido oon kée ndixi ri. ¹⁰ Táto'on k'i'o ndáa ndó'o tidó'oma, k'i'o dión ndáa ndó'o ri, dá chi ió íon ñá. Ta ni natiin rí choon ña xí'ín ndó'o ri dár'u'u ka'í ri ñayuu o'on toon yoo. ¹¹ Ta mií ángel dándáki nda maá ini yáí konó ñóó kúú sato'o ri, ta Abadón nanián xí'ín to'on hebreo, ta xí'ín to'on griego nanián Apolión. To'on yó'o kóni kaa, ña dánaá ñaá.

¹² Ni ya'a va iin tandó'ó, tído vei uu kaan.

¹³ Tá ni tuu ángel kúú iño ñóó trompeta na, dá ni seido'i tachi iin ñayuu, ta tachi yó'o ni kixi chí me'í ndin komi ndíki ndíta iin iin titó noo náa oro íin noo Ndios, ¹⁴ ta ni kaaan xí'ín ángel kúú iño, na ni tuu trompeta ñóó:

—Kua'án ndasón ndin komi ángel ndíko yu'ú yuta ká'ano naní Eufrates —kaáan.

¹⁵ Dá ni ndaxí ndin komi ángel ndíko ñóó, ta ángel yó'o kían sa daá ió nduu ndáti kasandaá hora yó'o, xí'ín kuu yó'o, xí'ín yoo yó'o, xí'ín kuaia yó'o, dá ka'anián iin ta'ándá ñayuu noó oni ta'ándá na. ¹⁶ Ta ña yó'o ndáka iin tu'u ká'ano soldado kándodó kuéi. Ta ni seido'o yu'u ña kúú rá uu ciento millón soldado. ¹⁷ Ta ña yó'o ni xinii ni kee Ndios, ta ndidaá kuéi ñóó xí'ín ndidaá ta kándodó ri ní'ino do'onoo ka, ta ndé'an táto'on ndé'é ñóó ita. Ta ndí'í ta'anian táto'on ndé'é yuu ndato naní zafiro. Ta kuaán ta'anian táto'on k'i'o ndé'é azufre. Táto'on k'i'o ndáa diní ndika'a, k'i'o dión ndáa diní kuéi ñóó. Ta ini yú'u ri kánkuei ño'o ita, xí'ín ño'oma xí'ín azufre. ¹⁸ Ta ni xi'i iin ta'ándá ñayuu noó oni ta'ándá na ni kee ño'o ita xí'ín ño'oma xí'ín azufre, tá'an ña ni kánkuei yú'u kuéi ñóó. ¹⁹ Ta xí'ín ndée yú'u ri, ta xí'ín ndée ndó'o ri dárkue'e ri ñayuu, dá chi táto'on ndáa diní koo, dión ndáa diní ndó'o ri, ta xí'ín ña yó'o dárkue'e ri ñayuu.

²⁰ Ta ñayuu, na ko ní xi'i ni kee ndin oni tandó'ó yó'o, ko ní xín ií vá ná nandikó iní na, ta dánkoo na ña kini kée na, ni ko ní dándí'i na ña kían kandaño'o na ña u'u, ta ko ní dándí'i na ña kían kandaño'o na yoko

ni kava'a xí'ín oro, xí'ín plata, xí'ín bronze, xí'ín yuu o xí'ín yíto, va'ará ko túu nooán, va'ará ko táj do'an, va'ará ko kándaan, tído ndáño'o ij vá náan. ²¹ Ta ko ní nándikó iní na sa'á ña sa'ání ná ndii, ta ni sa'á ña kétadí na xí'ín ñayuu, ta ni sa'á ña kídí na xí'ín na ko kúú ñadi'í na o yíí ná, ta ni sa'á ña kí'in kuí'íná ná.

Kárxoo iin ángel ndakí, ta tárnee iin libro ló'o ndá'a ná

10 ¹ Ni ndi'i, dá ni xinií konoo iin ka ángel ndakí nda'o vei na nda induú, ta ni kii na tein iin viko, ta íin iin chiyángí diní ná. Tátoto'on ki'o ndé'é ndindii, ki'o dión ndé'é noo ná. Tátoto'on ki'o ndé'é ñó'o sá'ano ita, ki'o dión ndé'é sa'a ná. ² Ta tárnee iin libro ló'o ndá'a ná, ta nónó nooán. Ta xí'ín sa'a xoo kuá'a na séin na noo taño'o, ta xí'ín sa'a xoo íti na séin na noño'o ichí. ³ Ta tátoto'on ki'o káyu'ú ndika'a tondó, ki'o dión ni káyu'ú ná. Dá tá ni ndi'i ni káyu'ú ná, dá ni ka'andi usa ta'ándá. ⁴ Dá tá ni ndi'i ni ka'andi ñoo, dá kua'an yu'u taai ndi kóni kaa ña ni ka'andi ñoo. Tído ni seido'i iin tachi na ni ka'an xí'ín nda induú, ta kaáan:

—Ná dá'a ni taaón ndi kóni kaa ña ni ka'andi kaa. Va'a kaan ná koo de'é nian noo míion.

⁵ Dá ni xinií ni ndane'e ángel íin séin noo taño'o ñoo xí'ín noño'o ichí ñoo ndá'a xoo kuá'a na chí induú di'a, ⁶ dá ni nachina'á ná Ndios, na daá takí kuií, na ni kava'a induú xí'ín noño'o xí'ín taño'o, xí'ín ndidaá ña'a ió nooán, ña o kándati ka na cháá ka tiempo, ⁷ dá chi tá ná kasandaá kuú kasá'a tuu ángel kúú usa ñoo trompeta na, dá natuu ndidaá ña sa io de'é ni kee mií Ndios tátoto'on ki'o ni kaa na xí'ín profeta, tá'an na sa xino kuáchí noo ná, kaá ángel ñoo.

⁸ Ta mií tachi na ni seídó'i ni ka'an xí'ín nda induú, ñoo kían ni ka'an tuku xí'ín, ta kaáan:

—Kua'an ki'ón libro ló'o nónó noo tánee ndá'a ángel íin séin noo taño'o xí'ín noño'o ichí kaa.

⁹ Dá ni keei kua'in noo íin ángel ñoo. Dá ni kaai xí'ín ná ña ná tei na libro ló'o ñoo nooí. Dá ni kaa na xí'ín:

—Jó'on, keí ñá viti, dá ná kankao ova ña ini tison, tído kankao vidian tátoto'on vidí ndudí ini yú'on —kaá na.

¹⁰ Dá ni natiiin libro ló'o tánee ndá'a ángel ñoo. Dá ni seíí ña. Ta kúú ni kankao vidian ini yú'í tátoto'on ki'o vidí ndudí, tído ini tixi ni kankao ova ña. ¹¹ Dá ni kaa na xí'ín:

—Miían ndusa kánian kasto'ón xí'ín ñayuu sa'á ndí kían ndo'o kua'á nda'o ñoo xí'ín nación, xí'ín na ká'an iin rá iin yú'u, xí'ín rey dándaki ñaá.

Di'a ni ndo'o uṽ ɬaa ni xi'o ndaa kuendá sa'a Ndios

11 ¹ Dá ni ni'i yu'u iin ndoo, ta káa rá táto'on káa iin vara chíki'ó na. Dá ni ta'anda choon nooí, chí kaá na xí'ín:

—Kua'an chíki'óon ve'e ño'o Ndios, xí'ín noo náa, ta naka'ávón ndidaá kúu na ndéi ndáño'o Ndios. ² Tído ná dá'a ni chíki'óon yé'é sata vé'e, dá chí na tukú, na kó kúu ñayuu Ndios, ni natiin yé'é sata vé'e, ta ko'on na koni xíxi na ñoo iṽ ñoo tein uṽ diko uṽ yoo. ³ Ta ko'in tanda'í uṽ ɬaa xí'o ndaa kuendá sa'í, dá ka'an ra xí'ín ñayuu sa'a ndidaá ña koo. Ta dión kee ra iin mil uṽ ciento onṽ diko kuu, ta kandixi nda'í ra.

⁴ Ta ndin nduú ɬaa yó'o kúu ndin nduú yíto olivo, ta kúu ta'ani ra ndin nduú candelero ndíta toon noo Ndios, na kúu sato'o ñayuú yó'o. ⁵ Tá ió iin káa na ka'an kendava'a xí'ín rá, ta kúu kankuei ño'ó ita yú'u rá, dá dándúta ra ɬaa xiní u'u ñaa. Ta ndi ndaa mií na kónṽ kendava'a xí'ín rá, kí'o dión ta'ani kánian kuu na. ⁶ Ta ɬaa yó'o kakomí choon ña kían kadi ra induú, dá o kóon dai xí'ín ndidaá tein kuu dána'a ra sa'a ndí kían koo. Ta kane'e ra choon ña ndee ra ɬakuij ni, ta kane'e ta'ani ra choon ña dándó'o ra níṽ ñayuu ndidaá ta'ándá ká'an mií rá.

⁷ Tá ná dándí'i ra choon ni ni'i rá, dá keta kítṽ tondó ká'ano yu'ú yáí konó ñoo, ta naá ri xí'ín ndin nduú ɬaa yó'o, dá kandeé ri xí'ín rá, ta ka'aní ñaa rí. ⁸ Ta yikí koño ra kandeí noo yá'i ñoo ká'ano, tá'an ña ká'an na xí'ín Sodoma xí'ín Egipto. Ta ñoo yó'o ta'ani kúu noo ni chírkaa na sato'o yo Jesús ndika cruz. ⁹ Ta na ndéi ndidaá ñoo ná'ano xí'ín ndidaá ñoo kuálí, xí'ín na ká'an iin rá iin yú'u, xí'ín na ndéi ndidaá nación koni kandeí yikí koño ra noo yá'i ñoo onṽ kuu dao, ta kó iin konó ña nduxian. ¹⁰ Ta kadij nda'o ini ñayuu ndéi noño'o sa'á ña ni xi'i ra, ta kee na iin víko ká'ano, ta dasá tá'an na ña'a noo ná, dá chí ni ndo'o nda'o níṽ na ndéi ñayuú yó'o ni kee ndin nduú profeta ñoo.

¹¹ Tído tá ná ya'a onṽ kuu dao, dá nataki ndin nduú ra kee Ndios, ta kúu ndakuei va ra. Ta kúu yu'ú nda'o ñayuu ndéi ñayuú yó'o tá ná koni na ña ni nataki ra. ¹² Dá kueídó'o ra tachi iin na ka'an ni'i chí induú, ta di'a kaaan xí'ín rá:

—Kua'an kaa ndó na'a kíi ndo.

Ta sata iin viko kaa ra ko'on ra induú, ta ndidaá na xiní u'u ñaa koni xí'ín noo ná ña dión koo. ¹³ Ta mií hora daá ni'i nda'o ɬaan, ta noo iin iin ciento ve'e ndíta ñoo, koon uxian, ta kuu usa toon mil ñayuu. Ta dao ka ñayuu kandoo ñoo, yu'ú nda'o na kee ña kuu ñoo, dá kasá'á ná keká'ano na Ndios, na ió induú.

¹⁴ Dión ni kuu, dá ni ya'a tandó'ó kúu uṽ, tído vej iin kaan, ña kúu onṽ.

Di'a ni kuu tá ni tuu ángel kúu usa ñoo trompeta na

¹⁵ Tá ni tuu ángel kúu usa ñoo trompeta na, ta kúu táí ni'i nda'o ni kayu'ú kua'á tachi chí induú, ta kaaan:

Ni natiin Ndios, na kúu sato'o yo, xí'ín Cristo ndidaá choon,
ta dándáki kuií na.

¹⁶ Dá ni sa kuíta xití ndin oko komi ta sá'ano ndéi díin Ndios noo ió na dándáki na, ta ni xino taan ra nda noñó'o ndáño'o ñaá rá, ¹⁷ ta kaá ra: Nákí'o ndu ndivé'e noo ní, sato'o Ndios, mií ní kúu na kándéé kée ndidaá tá'an ña'a, ta mií ní kúu ní, ta mií ní ni sa kuu ní, ta mií ní kúu na kasaa. Ndivé'e ní, dá chi mií ní kúu na ni natiin ndi'i choon viti, ta ni kasá'á dándáki ní.

¹⁸ Ni xido nda'o ini ndidaá nación, tído viti kían ni kasaa ña xido ini mií ní, dá chi sa ni kasandaá kuu keyíko ní sa'á ñayuu ni xi'i. Ta ko'on ní kemáni ní profeta, tá'an na sa xinkuáchí noo ní, ta kemáni ta'ani ní ndidaá ñayuu mií ní, xí'ín ndidaá ka na yu'ú ni'ini ñaá, á mií ná kuálí ná o á mií ná ná'ano na.

Ta sa ni kasandaá ta'ani kuu dánaá ní na kéndava'a xí'ín noñó'o.

¹⁹ Dá ni nono yé'é ve'e ño'o Ndios induú, ta túu iin iin sato, kirá dándáki ña ni kandoo Ndios kemáni ná ñayuu na. Ta ni sa kuíta tasa, ta tái ká'an ñayuu, ta ní'i xido kúu ka'andi, ta ni kasá'á táan, ta ná'ano nda'o ñíni ni kasá'á koon.

Di'a ni kuu tá ni naá koq kua'á ká'ano xí'ín iin ñá'a

12 ¹ Ni ndi'i, dá ni xini iin ka ña'a xixi kua'an chí induú, chi ni xini iin ta'ána ñá'a, ta dá'on ndíxián kúu ndindii, ta tixi sa'an nákaa yoq, ta kánóo iin corona ni kava'a xí'ín uxí uu tiñoq dinian. ² Ta ñó'o de'an, ta káyu'an, chi sáxián tixián, dá chi sa káki de'an, sa'á ñoq ndó'o níqan. ³ Ta ni xini ta'anii iin ka ña'a ká'ano chí induú, ta ña yó'o kúu iin koq kua'á ká'ano, ta usa kúu diní rí, ta uxí kúu ndíki rí, ta iin iin diní rí ñó'o tikata kuaán. ⁴ Ta xí'ín ndó'o rí ni yakó rí iin tá'í noo ndin oní tá'í tiñoq ñó'o induú, ta ni dakuéi ñaá rí nda noñó'o. Ta ni sartuu koq ká'ano yó'o mií noq ta'ána ñá'a sa kua'an kaki de'e ñoq, dá kokó rí de'an tá ná kaki xi. ⁵ Ta kúu ni kaki va de'e ñá'a yó'o, ta kúu xí iin tayí. Ta kasandaá xi dándáki xi ndidaá tá'an nación xí'ín vara kaa. Tído ni ditá ní'ini ñaá Ndios yu'ú koq ñoq, dá koo xi xí'ín ná noo ió na dándáki na. ⁶ Dá ni xino ñá'a yó'o noq koq ñoq kua'an noñó'o ichí noq ni kenduu Ndios kooán, ta ñoq koto ñaá ná iin mil uu ciento oní diko kuu.

⁷ Ni ndi'i daá, dá ni kuu iin ña'a chí induú, chi ni ndakuín Miguel xí'ín ndidaá ka ángel ndíta xí'ín ná, dá ni naá na xí'ín koq ká'ano ñoq, xí'ín ndidaá ángel kini ndíta xoo mií rí. ⁸ Tído ko ní kándeé rí naá rí xí'ín ná, ta ko ní ni'i ka rí noo koo rí xí'ín ángel rí induú. ⁹ Dá ni dakána na koq ká'ano ñoq kua'an rí nda sata vé'e, kirí kúu koq sá'ano, kirí kúu timí'á, kirí naní Satanás, ta kirí yó'o kúu rí xionoo dánda'í ñayuu iin ní kúu

ñayuu. Ta ni dakána ni'ini na ri ni naxino ri nda noñó'o xí'ín ndidaá ángel ti.

¹⁰ Dá ni seido'i ni kayu'ú iin na chí induú, ta kaá na di'a:

—Sa ni kasandaá vá kuu dákaki Ndios ñayuu na, ta ni natiin na ndidaá ndée, ta dándáki na ndidaá kúú ñayuu viti. Ta kómí Cristo choon viti, dá chi sa ni dakána va na kirí dátaí kuachi na kándísa xí'ín yó noo Ndios, tá'an kirí sa dátaí kuachi ñáá nduú ñóó. ¹¹ Tído ni kandeé vá ñayuu ñóó xí'ín rí ni kee niñ na kúú léko, kirá ni xita sa'a ná, xí'ín sa'a ña ni sa xi'o ndaa na kuendá sa'a to'on va'a Jesús, chi ko ní ndi'i ta'on ini na sa'a ña kataki na, di'a ni xi'o na mií ña kían kuu na sa'a Ndios. ¹² Sa'a ñóó ná kadii iní yo'ó, induú, ta ná kadii iní ndo'ó, na ndéi xaan. Tído nda'í kúu ví ndo'ó, na ndéi noñó'o xaan, xí'ín ndo'ó, kirí ñó'o ini taño'o xaan, dá chi xido nda'o ini kirí u'u konoo rí kosaa ri noo ndéi ndó, chi ná'á rí ña ndadá cháá vá kuu koo rí —kaá na.

¹³ Tá ni kandaá ini koo ká'ano ñóó ña ni dakána ñáá Ndios kua'an ri nda noñó'o, dá ni kee rí tákaa rí sata ñá'a, ña ni dakáki tayíí ló'o ñóó, kua'an ri. ¹⁴ Dá ni ni'i ta'áná ñá'a ñóó uu ndixi ná'ano kirí ya'a, dá kuu ndarneeán ko'an nda noñó'o ichí, dá kandoo koo ñóó, dá kasandaan noo ni kenduu Ndios kakaa de'áan, noo koto ñáá ná oni kua dao. ¹⁵ Dá ni ndusa rí kua'á nda'o takuíí sata ta'áná ñá'a ñóó, dá dátáni ñáá rí, ni ka'án rí, dá chi takuíí ni kankuei yú'u ri kúú táto'on iin yuta. ¹⁶ Tído ni chindeé vá ñáá noñó'o yó'o, dá chi ni nono yú'án, ta kúú ni xi'i ndi'an takuíí yuta ni kankuei yú'u koo ká'ano ñóó. ¹⁷ Ta kúú ni xido nda'o ini koo ká'ano ñóó ni xini ri ta'áná ñá'a ñóó. Sa'a ñóó ni kee rí kua'an ri naá ri xí'ín ndidaá ka de'án, tá'an na né'e va'a choon ni sa'anda Ndios noo ná, chi na yó'o kúú na xi'o ndaa kuendá sa'a Jesucristo.

Di'a ni kee uu kirí kini

13 ¹ Ni ndi'i, dá ni sa kuíin yu'u noo ñotí yu'ú taño'o, dá ni xiniñ ni xinkoo iin kití deen vei rí noo taño'o ñóó. Ta usa kúú dini ri, ta uxí kúú ndíki ri, ta iin iin ndíki ri ñó'o tikata kuaán, ta iin rá iin dini ri tándaa kuu ká'an ndava'a sa'a Ndios. ² Ta táto'on ki'o kaa chitó deen naní leopardo, ki'o dión kaa kirí kini yó'o. Ta táto'on ki'o ndaa sa'a oso, ki'o dión ndaa sa'a ri. Ta táto'on ki'o ká'ano yú'u ndika'a, ki'o dión ndaa yú'u ri. Ta ni nakí'o mií koo ká'ano ñóó ndée ri noo kítí yó'o, ta ni nakí'o ta'ani rí téi noo dándáki rí noo ri, ta ni xi'o ta'ani rí ndidaá tá'an choon sa ne'e rí noo ri. ³ Ta ni xiniñ ña ni tarkue'e iin dini ri, ta kua'an ri kuu ri keean. Tído ni nduva'a va dini ri noo ni tarkue'e ñóó, ta ko ní xi'i ta'on rí. Sa'a ñóó ni naá téi ini ñayuu ni xini na, ta ni kasá'á ná ndíko na rí. ⁴ Ta ni kasá'á ná ndáño'o na koo ká'ano, kirí ni xi'o choon noo kítí yó'o, ta ni kasá'á ndáño'o ta'ani na mií rí, ta di'a kaá na kéká'ano na ri:

—¿Ndá yoo kándéé kée táto'on kée kirí chiká'ano yó'o? Ta, ¿ndá yoo kandeé naá xí'ín rí? —kaá na.

⁵ Ta ni ni'i ta'ani rí ña ka'an ri ndidaá to'on táyíí, dá chindaya'i rí mií rí, ta ka'an ndava'a rí sa'a Ndios. Ta ni ni'i ri choon ña dándáki rí uu diko uu toon yoo. ⁶ Sa'a ñoó ni kasá'á rí ká'an ndava'a rí sa'a Ndios, ta kénóo rí kuu ná, ta ká'an ndava'a rí sa'a ve'e ño'o noo ió Ndios, xí'ín sa'a ndidaá na ndéi induú. ⁷ Ta ni nono noo ri ña kían naá ri xí'ín ñayuu Ndios, ta ni nono noo ri ña kandeé rí xí'ín ná. Ta ni ni'i ta'ani rí choon ña kían dándáki rí ndidaá ñoo kuálí, xí'ín ndidaá ñoo ná'ano, xí'ín na ká'an iin rá iin yú'u, xí'ín na ndéi ndidaá nación. ⁸ Ta ndidaá tá'an ñayuu ndéi ñayuu yó'o ni kasá'á ndáño'o na ri, chi nda rá ko ñá'a kasá'á sa'a ñayuu, nda daá vá ko kándodó kuu ná noo libro noo kándodó kuu na ni'í ña kataki chíchí. Ta ña yó'o kúu libro na kúu léko, na ni sa'áni ná.

⁹ Sa'a ñoó ndi ndáa ndo'ó ió do'o, ná kueídó'o ndó noo ká'in. ¹⁰ Dá chi na ni kania kaka ve'e kaa, ve'e kaa va kasandaá na, ta na ni kania kuu xí'ín espada, ki'o dión kuu na. Sa'a ñoó kánian kande nduu ñayuu Ndios ndo'o nío ná xí'ín ña ndeé iní na, ta kánian kandita toon na xí'ín ña kándéé iní na Ndios.

¹¹ Ni ndi'i, dá ni xini ni xinkoo iin ka kiti chiká'ano chí tixi ñó'o di'a, ta uu kúu ndíki ri, ta táto'on ki'o ndáa ndíki borrego, ki'o dión ndáaan. Tído táto'on ki'o ká'an ko ká'ano ñoó, ki'o dión ká'an kirí ñoó. ¹² Ta né'e ta'ani rí choon táto'on né'e kiti mií noó ñoó, ta noo mií rí kée kirí yó'o ndidaá ña'a. Ta dáka'an ri ndidaá ñayuu, dá kandaño'o na kirí mií noó ñoó, kirí ni nda'a dini noo ni tarkue'e ka'í ñoó. ¹³ Ta kua'á nda'o ña'a ná'ano kée ri, dá chi nda induú dákóon rí ño'ó ita noo ndidaá ñayuu. ¹⁴ Dánda'í ri ñayuu ndéi noño'o, chi ni ni'i ri ña kandeé rí kee rí ña ná'ano noo kiti mií noó ñoó. Ta ni sa'anda ri choon noo na ndéi noño'o ña ná kava'a na iin na'áná, ña káa táto'on káa kirí mií noó ñoó, tá'an kirí ni nda'a dini noo ni tarkue'e ka'í xí'ín espada. ¹⁵ Ta ni nono noo ri ña kían ki'o rí tachi noo na'áná ni kava'a ñoó, dá kuu ka'an. Ta kómían choon ka'ánían ndidaá ñayuu ko kándía kandaño'o ñaá. ¹⁶ Ta ni sa'anda ri choon ña ná ñani tóni ndá'a xoo kuá'a ndidaá ñayuu o taan na, ta ko né'e tandíni á mií ná kuálí ná o mií ná yata ná, á mií ná kuíka ná o mií ná kúnda'í na, á mií ná kúu ná sato'o o na ño'o tixi ndá'a iin sato'o. ¹⁷ Ta ni iin tó'on ta'on ñayuu o kúu kuiin na ña'a, ta ni o kúu ta'on dikó naan tá koó tóni ñoó o kuu ri o número kuu ri tánda ndá'a ná o taan na. ¹⁸ Yó'o kóni ñaxintóni, ta kóni dini, dá taó kuendá ndo número kiti chiká'ano yó'o, chi número yó'o ká'an sa'a iin ta, ta número yó'o kúu iño ciento oni diko iño.

Xíta iin ciento uꝯ diko komi mil ñayuu

14 ¹ Ni ndi'i, dá ni xiniꝯ iin ndichi na kúú léko ñoó dini yúku nani Sión, ta dín ná ndíta iin ciento uꝯ diko komi mil ñayuu, ta taan iin rá iin na tándaa kuꝯ léko ñoó xí'ín kuꝯ tatá na. ² Dá ni seido'i ni'i ká'an na chí induú. Ta táto'on ki'o ní'i xido takuií kua'a, ki'o dión ni'i ká'an na. Ta táto'on ki'o káyu'ú dai, ki'o dión ni'i ká'an na. Ta kádían táto'on ki'o kúu tá dáká'a na arpa, ki'o dión kúu noꝯ ká'an na. ³ Ta xíta na iin yaa saá noꝯ na ió dándáki ñoó, xí'ín noꝯ ndin komi ña takí ñoó, xí'ín noꝯ ndin oko komi ta sá'ano ndéi dín ná ñoó. Ta ni ko iin ta'on kandeé katí'a yaa xíta na, sava'a iin ciento uꝯ diko komi mil ñayuú ni dakáki Ndios tein ñayuu ndéi ñayuú yó'o kúú na xíta ña. ⁴ Dá chi ndidaá na yó'o ko ní ya'a ta'on na kee na kuachi xí'ín na ñá'a, sa'á ñoó ndáa vii vá ná. Ta ndidaá na yó'o ndíko na satá na kúú léko kua'an na ndéi kúú míi vá noꝯ ná ko'on na. Ta ndidaá na yó'o kúú na ni dakáki Ndios tein ndidaá ñayuu, dá kakuu na na mií noꝯ natiin Ndios xí'ín na kúú léko ñoó. ⁵ Ta ni iin tó'on ta'on ña to'on ko ní kánkuei yú'u ná, chi kúú ná ñayuu ndáa vii noꝯ Ndios, noꝯ ió na dándáki na.

Oni ángel xí'o ndaa kuendá

⁶ Ni ndi'i, dá ni xiniꝯ tánee iin ka ángel xionoo na me'í induú, ta né'e na to'on va'a Jesús, ña daá kuití koo, dá dána'a na ña noꝯ ñayuu ndéi noñó'o, noꝯ ndidaá nación, noꝯ ndidaá ñoo kuálí, noꝯ na ká'an iin rá iin yú'u, xí'ín noꝯ na ndéi iin rá iin ñoo ná'ano. ⁷ Ta kaá na di'a káyu'ú ná:

—Kayu'ú ni'ini ndó Ndios, ta ki'o ndó ñañó'ó noꝯ ná, chi sa ni kasandaá kuꝯ keyíko na sa'á ñayuu. Ta kandaño'o ndó Ndios, na ni kava'a induú xí'ín noñó'o, xí'ín taño'o xí'ín iin rá iin ndúta noꝯ kána takuií.

⁸ Ta sata ángel yó'o tánee iin ka ángel vei na, ta di'a káyu'ú ná vei na:

—Ni yaa va ñoo Babilonia, ni yaa va ñoo Babilonia, ña kúú ñoo ká'ano, dá chi ni daxinián ndidaá tá'an nación xí'ín ña kini xí'ín ña ka'an noꝯ kée de'é ñooan.

⁹ Ta sata ángel yó'o tánee iin ka ángel kúú oni vei na, ta di'a káyu'ú ná vei na:

—Ndi ndáa mií vá na ni kandía ndaño'o kítí chiká'ano ñoó xí'ín na'ána ri, ta ni kandía ta'ani na ni ñani tóni ndá'a ná o taan na, ¹⁰ dá kían kánian ko'o na vino ova, ña kúú ña xido ini Ndios xini ñaá ná, chi ko'on Ndios kuei ndi'i na ña xido ini na satá ñayuu ñoó. Sa'á ñoó ndo'o kini níó ná kee ño'ó kéi xí'ín azufre noꝯ ángel xí'ín noꝯ na kúú léko. ¹¹ Ta daá kuití kuiin ndichi ño'oma noꝯ ño'ó na ndó'o níó ná, ta ni nduú ni ñoó o koní na nani'i ndée ná, chi ni sa ndaño'o na kítí chiká'ano ñoó xí'ín na'ána ri, ta ni kandía na tándaa tóni ri ndá'a ná o taan na.

¹² Sa'á ñoó kánian k̄i'o ndeé iní ndidaá ñayuu Ndios, tá'an n̄a ndíta ndaa x̄i'ín choon n̄i sa'anda Ndios noo ná, n̄a kándéé ká'ano iní Jesús.

¹³ Ta n̄i seido'i n̄i ka'an iin tach̄i n̄a n̄i ka'an nda induú:

—Ta taa di'a noo tuti xaan: “Ta yó'o chí noo ndiká'an ndi kúu ví na kuu sa'á ña kúu ná kuendá sato'o yo Jesús.” Jaan, dión kían, kaá Espíritu ī Ndios. Miían ndaa koni n̄a nani'i ndée ná, dá chí na'a ī vá choon n̄i kee na.

Di'a n̄i kuu tá n̄i sa'anda iin ángel tirió x̄i'ín uva noñó'o yó'o

¹⁴ Ta n̄i xinī tánee iin viko kux̄i ndato nda'o, ta nooán ñoó ió iin taa, ta kóni koo ra tát'on k̄i'o káa iin t̄a ñayuu yó'o. Ta kánóo iin corona oro din̄i rá, ta né'e ra iin hoz deen. ¹⁵ Dá n̄i keta iin ka ángel ini ve'e ño'o Ndios, ta kúu n̄i'ndá'o n̄i kayu'ú ná noo r̄a ió noo viko ñoó:

—Chikaa yo'ó hoz sa'a tirió xaan viti, ta ka'andaan, chí sa n̄i kasandaá va kuu ta'anda ña, dá chí sa ndidaá vá tirió káa noñó'o xaan n̄i ichi.

¹⁶ Dá n̄i chikaa r̄a ió noo viko ñoó hoz sa'a tirió káa ñoó, dá n̄i sa'anda ndi'i ra tirió káa nooán.

¹⁷ Dá n̄i keta iin ka ángel ini ve'e ño'o Ndios, ña íin induú, ta tánee ta'ani iin hoz deen ndá'a ná vej na. ¹⁸ Dá n̄i keta ta'ani iin ka ángel chí noo náa Ndios di'a, ta n̄a yó'o kómí choon sata ño'ó kéj. Dá n̄i kayu'ú ná iin ka ángel né'e hoz deen ñoó, ta kaá na:

—Chikaa hoz deen né'on xaan sa'a iin rá iin tu'u uva íin noo yito káa noñó'o xaan, dá chí sa n̄i chichi va rí.

¹⁹ Dá n̄i chikaa ángel ñoó hoz deen né'e na sa'a iin rá iin tu'u uva íin yito káa noñó'o. Dá n̄i taán ná r̄i noo kaño'o rí ko'on̄i r̄i noo ña xido ini Ndios. ²⁰ Ta nda yu'ú ñoo ñoó n̄i so'on̄i uva yó'o, ta noo n̄i so'on̄i r̄i n̄i xita kuá'á nda'o n̄i, ta n̄i kaa rá chí n̄ino tát'on dikó tánee yú'u kuéj, ta n̄i naka'ani rá tát'on on̄i ciento kilómetro.

Kásaa us̄a ka ángel, ta né'e na ndin us̄a tandó'ó noo ndí'i

15 ¹ Ni ndi'i, dá n̄i xinī iin ka ña'a ndato, ña ká'ano, ña naá inio xinio chí induú. Ta ña yó'o kúu us̄a ángel, ta né'e na ndin us̄a tandó'ó noo ndí'i kando'o ñayuu, dá ndi'i ña xido ini Ndios. ² Dá n̄i xini ta'anii iin ña'a káa tát'on káa taño'o, ta yé'e r̄a tát'on yé'e yuu tatá, ta n̄i naki'in tá'an rá x̄i'ín ño'ó kéj ita. Ta n̄i xini ta'anii ndidaá n̄a n̄i kandeé x̄i'ín kiti chiká'ano ñoó, x̄i'ín na'ána r̄i, chí ko ní sá ndaño'o ñaá ná, ta ko ní kándia na ñani tóni ná x̄i'ín kuu r̄i o número kuu r̄i. Ndidaá n̄a yó'o ndíta noo taño'o yé'e tát'on yé'e yuu tatá ñoó, ta ndidaá n̄a yó'o né'e arpa Ndios ndíta na. ³ Ta xita na yaa n̄i xita Moisés, tá'an n̄a sa xinkuáchí noo Ndios, x̄i'ín yaa xita n̄a kúu léko, ta di'a xita na:

Ña ná'ano kée ní, ta ña ndato nda'o kée ní, sato'o ndu.

Mií ní kúu n̄a kándéé kée ndidaá tá'an ña'a.

Ta mií ní kúu n̄a kéndúsá'ano, ta mií ní kúu n̄a kée ña ndaa.

Ta iin tó'ón diní mií ní kúú rey dándáki ndidaá tá'an ñayuu.

⁴ ¿Ndá yoo ví ná kaa ña o yu'ú na mií ní,

ña o kéká'ano na mií ní, sato'o ndu?

Ko iin ta'on, dá chi iin tó'ón diní mií ní vá kúú na ii.

Sa'á ñoó ná kuita ndidaá tá'an nación noo mií ní, ta kandaño'o na mií ní,

dá chi sa ni na'a ní ña kényiko ndaa ní ndidaá ña.

⁵ Tá ni ndi'i, dá ni xini ña chí induú ni nono yé'é noo kúú noo ii cháá ka ini ve'e ño'o, ña ná'a ña ni kandoo Ndios kemáni ná yó. ⁶ Ta ini ve'e ño'o ñoó ni kankuei usa ángel, ta ndin usa ángel ñoó né'e iin rá iin kue'e kando'o ñayuu. Ta ndíxi na dá'on kuxí kachi, ta náye'e ndaa oon víán, ta ni kaq noo iin cincho oro yu'ú ndíká na. ⁷ Ta tein ndin komi ña takí ñoó ni kana iian, ta né'an usa copa oro. Dá ni xi'oan iin rá iian noo ndin usa ángel ñoó, ta ni chití inian ñó'o ña xido ini Ndios, na daá takí kuií. ⁸ Ta kúú ni nakutí ve'e ño'o ñoó xí'in ño'oma, ta dión, dá ni na'a Ndios ndi ki'o ká'ano na, ta ni na'a na ndi ki'o ndakí na. Ta ni ko iin ta'on kuu ku'u ini ve'e ño'o Ndios nda ná xinkoo ndin usa kue'e né'e ndin usa ángel ñoó.

Di'a ni kuu tá ni kwei ángel ñoó copa na

16 ¹ Ta nda ini ve'e ño'o ñoó ni seido'i káyu'ú ná noo ndin usa ángel ñoó, ta kaá na:

—Kua'an ndo kata ndo nda noño'o kaa ña ñó'o ini ndin usa copa né'e ndó xaan, ña dándáki ña xido ini Ndios.

² Dá ni kwei ángel mií noo ñoó ndúta ñó'o ini copa na noño'o yó'o, ta kúú ni ndaki iin kue'e kini noo ñayuu ni kandía ni natiin tóni kiti chiká'ano, ta ni sa ndaño'o na na'ána ri. Ta kue'e yó'o ni datáni ñii ná, ta ni ndo'o nda'o nio ná ni keean.

³ Ni ndi'i, dá ni kwei ángel kúú uu ñoó ndúta ñó'o ini copa na noo taño'o. Ta kúú ni nduu taño'o ñoó nii, ta ndé'é rá táto'on ndé'é nii ndii. Ta kúú ni naá ndí'i va ña'a takí xí'in kirí takí ñó'o ini taño'o ñoó.

⁴ Ni ndi'i, dá ni kwei ángel kúú oni ñoó ndúta ñó'o ini copa na ini iin rá iin yuta xí'in ini iin rá iin ndúta noo kána takuií. Ta kúú ni nduu takuií ñoó nii. ⁵ Dá ni seido'i ni ka'an ángel dándáki takuií ñoó, ta kaá na di'a:

—Iin na ndaa nda'o kúú ní, sato'o ndu, mií ní ni sa kuu ní, ta mií ní kúú ní, ta mií ní kúú na ii, dá chi kényiko ndaa ní sa'a ndidaá ña'a, ⁶ ta sa'á ña ni sati na ndéi noño'o nii ñayuu mií ní, xí'in nii profeta ní, sa'á ñoó ni sa'an ní ni ndee ní takuií xí'i na kúú rá nii, chi ki'o dión kánian ndo'o na sa'á ña kini ni kee na.

⁷ Ta ni seido'i ni káyu'ú iin ka ángel nda noo náa Ndios, ta kaá na:

—Miían ndaa kuiti dión kíán, sato'o ndu, mií ní kúú Ndios kándéé kée ndidaá tá'an ña'a, ta kényiko ndaa ní, ta kényiko va'a ní sa'á ñayuu.

⁸ Ni ndi'i, dá ni kuei ángel kúu komi ñoó ndúta ñó'o ini copa na noó ndindii, dá ni ndudeen cháa kaan, dá ni chiñó'an ndidaa ñayuu xí'in ñó'o. ⁹ Ta ni kei ñayuu ñoó ni kee ká'an ndindii, ta ni ka'an ndava'a na sa'á kuu Ndios, na kómí choon sata ndidaa tandó'ó yó'o, ta ko ní xíin na nandikó iní na, ta ko ní xíin na k'i'o na ñañó'ó noo Ndios.

¹⁰ Ni ndi'i, dá ni kuei ángel kúu o'on ñoó ndúta ñó'o ini copa na noo ió kiti chiká'ano ñoó dándáki rí. Ta kúu ni nakuin naá iin ní kúu vá noo ió ri dándáki rí. Ta ñayuu ndéi ñoó ni kasá'á seí yí'í na yáa ná sa'á ña ndó'o téi nío ná, ¹¹ ta ni ka'an ndava'a na sa'a Ndios, na ió induú, chi ndó'o nda'o nío ná sa'á ña táni ñi ná. Tído ko ní nándikó ta'on iní na sa'á ña kini kée na.

¹² Ni ndi'i, dá ni kuei ángel kúu iño ñoó ndúta ñó'o ini copa na ini yuta ká'ano naní Eufrates, ta kúu ni ichi va takuii yuta ñoó. Ta kúu ni nono vá ichi noo ya'a ndidaa rey ndéi chí noo xinkoo ndindii. ¹³ Ta ni xini ni kankuei espíritu kini yú'u ko ká'ano xí'in yú'u kiti chiká'ano kuenda ña u'u ñoó, xí'in yú'u ta kúu profeta to'on. Ta ndin oni espíritu kini yó'o ndaa táto'on k'i'o ndaa lá'o, ¹⁴ dá chi espíritu ña u'u vá kíán, ta kuá'á nda'o ña ná'ano kándéé espíritu yó'o kéean. Ta ko'an noo ndéi ndidaa rey noño'o yó'o, dá nditútían ra, dá ko'on ra naá ra xí'in Ndios tá ná kasandaá kuu ni kaxi mií Ndios, na kándéé kée ndidaa tá'an ña'a.

¹⁵ Ta di'a kaá Ndios: “Yó'o ká'in xí'in ndó ña kasaaí táto'on k'i'o kée iin ta kui'íná. Sa'á ñoó ndiká'an ndi kúu ví na ndéi nduu, xí'in na ndaa dá'on ndíxi na, chi noón kúu na o kóo vichí ta'on, ta o túu ta'on ña kedaá xí'in ná xíka'an noo ná”, kaá na.

¹⁶ Ta ni nditútí espíritu kini ndidaa rey ñoó iin xían noo naní Armagedón, ta to'on yó'o kúu to'on hebreo.

¹⁷ Ni ndi'i, dá ni kuei ángel kúu usa ñoó copa na noo tachi, ta tái ni kayu'ú iin na ini ve'e ño'o Ndios induú, nda noo ió na dándáki na ñoó, ta kaá na:

—Sa ni kuu va viti.

¹⁸ Tá ni ndi'i ni ka'an na dión, ta kúu ni sa kuita tasa, ta tái ká'an ñayuu, ta ní'i xido kúu ka'andi. Ta ni kasá'á táan noño'o yó'o, ta kúu kini nda'o ni taan. Ni kuu ni hora ko ní taan ta'on dión noño'o yó'o nda ni kasá'á ndéi ñayuu nda viti. ¹⁹ Ta ni chachi ñoo ká'ano sa'á ña ni'i téi ni taan, ta oni tá'í ni chachi ña. Ta ndidaa ñoo ná'ano ñó'o iin rá iin nación ni koon ndi'an. Dá ni ndusaa ini Ndios ñoo ká'ano naní Babilonia, ña ni kasandaá kuu k'i'o na vino ova ko'o de'e ñooan, kirá dándáki ña xido nda'o ini na xiní ñaá ná. ²⁰ Ta ndidaa yuku ndíta ini taño'o xí'in yuku ndíta noño'o yó'o ni ndañó'ó ní'ini. ²¹ Ta kúu ná'ano nda'o ñiñi ni koon nda induú satá ñayuu ndéi noño'o, ta iin iin ña vee táto'on oko sa'on kilo. Ta kúu ni ka'an ndava'a ñayuu sa'a Ndios sa'á ña ni koon ñiñi sata ná, dá chi miífan ndaa kuiti tandó'ó ká'ano nda'o ni sa kian.

Kua'an iin ángel dándó'o na nio iin ñá'a díkó mií noó taa

17 ¹ Ni ndi'i, dá ni kii iin ángel tein ndin usa ángel, na ni sa ne'e usa copa ñoo, dá ni kaa na xí'ín:

—Nakíi chí yó'o, dá ná dána'i nooon ndí kee Ndios dándó'o na nio ta'áná ñá'a xixi kée díkó mií noó taa, ñá ió noó takuíi kua'a. ² Xí'ín ñá'a ñoo ni ya'a ndidaá rey ndéi noñó'o yó'o ni kee ra kuachi, ta ndidaá na ndéi noñó'o yó'o ni daxíni mií ná xí'ín ndidaá kuachi kéeán —kaá na.

³ Dá xí'ín ñaxintóni ndáka na yu'u kua'an na iin noñó'o ichí. Ta ñoo ni xini kánoo iin ta'áná ñá'a sata iin kítí chiká'ano, ta kua'a ni ndé'é rí, ta iin ní ñi ri ni nata'an tándaa to'on kini ña kían ká'an ndava'a sa'a Ndios. Ta usa kúu diní ri, ta uxí kúu ndíki ri. ⁴ Ta ndíxi ñá'a ñoo dá'on ndí'í, ña dáka tá'an xí'ín ña kua'a tóon, ta ni nata'an iin ní ñiian ñó'o ña'a oro, xí'ín yuu luu ndáa xí'ín perla. Ta tánee iin copa oro ndá'an, ta ni chití inian ñó'o ndidaá ña kini xí'ín ndidaá ña ka'an noo kéeán xí'ín ra ko kúu yíian. ⁵ Ta taan ñá'a yó'o ndá'a iin kuu, ta ni ko íin kátóni ini ndi kóni kaaan. Ta di'a kua'an kuu yó'o: “Ká'ano nda'o ñoo Babilonia, ña kúu naná ndidaá na ñá'a díkó mií, xí'ín naná ndidaá ña kini kua'an ió noñó'o.”

⁶ Ta ni xini ña xini ñá'a ñoo, chí ni daxínián miían xí'ín ni na kúu ñayuu Ndios, xí'ín ni na ni xi'i sa'a Jesús. Ta kúu ni naá vá iní tá ni xini ñá, chí iin ña'a naá inio kían kéeán.

⁷ Dá ni kaa ángel ñoo xí'ín yu'u:

—¿Ndiva'a naá inoon? Viti kían ná ko'in kasto'in xí'ón ndi kua'an sa'a ñá'a káa, xí'ín sa'a kítí chiká'ano kánooán káa, xí'ín sa'a ndin usa diní ri xí'ín sa'a ndin uxí ndíki ri. Ta ko íin ta'on ná'a ña ko'in kasto'in xí'ón.

⁸ Tá'an kirí ni xinon káa sa taki ri, tído ko takí ka ri viti. Vati xían daá, keta ii ri ini yái konó, noo koó noo sá tuu. Ndi'i ví, dá dánaá ñaá Ndios. Ta ndidaá ñayuu ndéi noñó'o yó'o, na ko kándodó kuu noo libro nda rá ni kasá'a sa'a ñayuú yó'o, tá'an libro noo kándodó kuu na ni'í ña kataki chíhí, noón kúu na naá iní tá ná koni na ña kee kítí ñoo, dá chí ni sa taki ri, ta ko takí ka ri viti, tído nataki tuku va rí.

⁹ Ta ña yó'o xinnó'o ñaxintóni, dá kanda inon ndi dándákian. Ndin usa diní ri kúu usa yúku, ta diní yúku ñoo ió ñá'a káa. ¹⁰ Ta kúu ta'anian usa rey. Ta sa ni kuei va o'on rey yó'o, ta viti dándáki iin ra, ta iin ka ra kamaní natiin ra choon. Tído tá ná kasandaá kuu dáa ñoo, cháa nda'o tiempo kánian dándáki ra. ¹¹ Ta mií kítí ni sa taki ñoo, ta ko takí ka ri viti, kirí yó'o kúu rey kúu ona, chí nákaa ri tein ndin usa rey yó'o, ta naá ri kee Ndios.

¹² Ta ndin uxí ndíki ni xinon káa kúu uxí rey, ta ko ñá'a ta'on natiin ra choon. Tído ndadá iin hora va kane'e ra choon xí'ín kítí chiká'ano káa.

¹³ Ta iin tó'ón vá nakani ini ndin uxí rey ñoo, sa'a ñoo naki'o ra choon né'e ra noo ndá'a kítí chiká'ano ñoo. ¹⁴ Ta rey yó'o xí'ín kítí yó'o naá

xí'ín nà kúú léko Ndios, tído kandeé vá léko xí'ín rá, dá chi mií ná kúú sato'o noo ndidaá sato'o, ta mií ná kúú rey noo ndidaá rey. Ta nà ndíta xoo nà kúú nà nì kana mií ná xí'ín nà nì kaxi mií ná, xí'ín nà ndíta toon xí'ín ná.

¹⁵ Ta nì kaa ta'ani ángel ñoó xí'ín yu'u:

—Takuií nì xinon ñó'o noo ió ñá'a díkó mií ñoó, kúú ndidaá tá'an ñoo, xí'ín ñayuu kua'a, xí'ín iin rá iin nación, xí'ín nà ká'an iin rá iin yú'u.

¹⁶ Ta ndin uxì ndíki nì xinon dinì kítì ñoó, xí'ín mií rí kúú rā koni u'u ñá'a díkó mií noo taa ñoó, ta dánkoo nda'í ñáá rá, ta taxí vichí ñáá rá, ta keí yí'í rā koñoan, ta chiñó'o ñáá rá. ¹⁷ Dá chi kì'o dión nì chikáa Ndios ini rā ña kían kee ra ña kóni mií ná. Sa'á ñoó naki'in tá'an ña nakani ini rā, dá naki'o ra choon né'e ra noo ndá'a kítì chiká'ano ñoó, dá ná xinkoo to'on kì'o ká'an to'on Ndios. ¹⁸ Ta ñá'a nì xinon káa kúú ñoo ká'ano, ña kían kómí choon sata ndidaá rey dándáki noño'o yó'o.

Di'a nì kuu tá nì naá ñoo Babilonia

18 ¹ Nì ndi'i, dá nì xiniì konoo iin ka ángel vei na nda induú, ta ká'ano nda'o choon né'e na vei na, ta kúú nì naye'e ndaa oon ví noño'o yó'o nì kee na, dá chi ndato nda'o yé'e na. ² Ta kúú nì'i nda'o táì nì kayu'ú ná, ta kaá nà:

—Sa nì yaa va ñoo ká'ano Babilonia, sa nì yaa va ñoo ká'ano Babilonia. Ta nì nduuan cho'o ña u'u, ta nì nduuan ká'o noo ñó'o ndidaá tachì kini, ta nì nduuan táka ndidaá tá'an laa kini ndáa, kirí kúú laa tikíni. ³ Dión nì ndo'o ñoo ñoó, dá chi nì xì'oan vino, kirá kúú kuachi ka'an noo, noo nà ndéi iin rá iin nación, dá nì xì'i na rā. Ta ndidaá rey ñayuu yó'o nì ya'a nì kee kuachi xí'ín ñoo yó'o. Ta ndidaá taa náka'an nda'ì ndéi noño'o yó'o nì kekuíká rá mií rá, dá chi nì xiin ñoo ñoó ndidaá ña'a xínño'an noo rá, dá keean kuachi ka'an noo, dá ndinoo iniàn.

⁴ Dá nì seido'i nì ka'an tachì iin ka nà nì ka'an chí induú, ta kaá nà di'a:

—Ndo'ó, nà kúú ñayuu mií, kankuei ndó ñoo xaan, dá ná dá'a ni kuei ndó noo kuachi kée nà ndéi xaan, dá kían ná dá'a ni ndo'o ní'o ndo kee tandó'ó vei ndo'o ñayuu xaan. ⁵ Dá chi ndidaá kuachi kée na nì xinkoo nda induú, tído viti ndékuendá Ndios sa'a iin rá iin ña kini kée na. ⁶ Sa'á ñoó kua'an ndo nandió né'e ndó noo nà ñoo káa ndidaá ña'a nì kee na xí'ín ndó. Ta noo iin rá iin ña kini nì kee nà ñoo ñoó xí'ín ndó, kua'an ndo kee ndoan uu ta'ándá xí'ín ná. Ta kua'an ta'ani ndó taán ndo uu ta'ándá ndirá ova cháa ka o duú ndiróon nì xì'o na noo míí ndó, ta naki'o ndó rā nooan. ⁷ Ta sa chindaya'i ñoo yó'o miíán, ta sa katoóan keeán kuachi ka'an noo. Táto'on sa keeán kuachi, kì'o dión kì'o ndó ña ndo'o níman, ta kì'o dión ta'ani kì'o ndó ña ná kuakián. Dá chi sa kuryíí ñoo yó'o xí'ín miíán, ta kaáan: “Yó'o ióì kúúí iin reina, ta ko kúú ta'oin

iin ña kuáan, ta ni iin kuu ta'ón o kuákii.”⁸ Ta sa'á ña ká'an dión, sa'á ñoó iin tó'ón daá vá kuu kasaá kue'e sataan, ta kuu ndi'i de'e ñooan, ta nda'í kuakián, ta nda'í kuikoán, ta xí'ín ñó'o kéi ita kei ña, dá chi ná'ano nda'o ña'a kee Ndios, na kúu sato'o yo, ta mií ná keyíko sa'an.

⁹ Ta ndidaá rey dándáki noñó'o yó'o, tá'an ra ni ya'a ni kee kuachi xí'ín ñoo yó'o, tá'an ra ni sa ndei dii xí'án, roón kúu ra kuaki, ta nda'í ka'an ra sa'an tá ná koni ra ña iin ndichi ño'oma tóon kéi ña. ¹⁰ Ta xíká nda'o kuita ra sa'á ña yu'ú ra ña kéi ñoo ñoó, ta kaa ra:

—Nda'í kúu ví ñoo ká'ano Babilonia káa, nda'í kúu víán, ña kúu ñoo ndakí, dá chi iin hora di'a ni naá ndí'an ni kee Ndios.

¹¹ Ta nda'í kuaki ndidaá ta náka'án nda'i ndéi noñó'o yó'o, ta nda'í ka'an ra sa'a ñoo yó'o, dá chi ko iin ka kuiin ña dikó rá táto'on ki'o sa kee ñoo yó'o, ¹² dá chi va'a ni sa xiian ña ni kava'a xí'ín oro, xí'ín ña ni kava'a xí'ín plata, xí'ín ña ni kava'a xí'ín yuu luu ndáa, xí'ín perla, xí'ín dá'on táyíí ndáa, xí'ín dá'on kua'á toón, xí'ín dá'on seda, xí'ín dá'on kua'á nii, xí'ín yíto támi sá'an, xí'ín ndidaá ña ni kava'a xí'ín no'o yokó elefante, xí'ín ña ni kava'a xí'ín yíto va'a, xí'ín ña ni kava'a xí'ín kaa kuaán, xí'ín ña ni kava'a xí'ín kaa oon, xí'ín ña ni kava'a xí'ín yuu ndato naní marmol, ¹³ xí'ín canela, xí'ín ndúta támi sá'an, xí'ín dusa, xí'ín duku támi sá'an, xí'ín dusa kuxí támi sá'an, xí'ín vino, xí'ín sití, xí'ín harina ndato, xí'ín tirió, xí'ín kirí xío vee, xí'ín borrego, xí'ín kuéi, xí'ín carreta, xí'ín ñayuu kéchóon, xí'ín níó ñayuu. ¹⁴ Ndidaá kui'i va'a sa katoó ñoo káa ni kuxíká vá nooan viti. Ta ndidaá ña va'a xí'ín ña ndaya'i ni kuxíká vá nooan, ta ni iin kuu ka o konían ndidaá ña yó'o.

¹⁵ Ta ndidaá ta náka'án nda'i xí'ín ña va'a yó'o ni kekuíká rá mií rá ni kee ñoo ñoó, dá chi sa xiin va'án noo rá. Ta xíká nda'o kakuíta ra sa'á ña yu'ú ra ña kéi ñoo ñoó, ta nda'í kuaki ra, ta nda'í ka'an ra, ¹⁶ chi kaa ra:

—Nda'í kúu ví ñoo ká'ano káa, nda'í kúu ví ñoo sa ndixi dá'on táyíí ndáa, xí'ín dá'on kua'á toón xí'ín dá'on kua'á nii, ta ni sa komíán ña'a oro xí'ín yuu luu ndáa xí'ín perla, ta sa kaa táyííán. ¹⁷ Nda'í kúu víán, dá chi iin hora di'a ni naá ndí'i ña kuiká sa komíán —kaa ra.

Ta ndidaá ra dákáka barco xí'ín ra chindeé tá'an xi'ín rá, xí'ín ndidaá ka taa kéchóon noo taño'o kakuíta nda noo xíká ñoó ¹⁸ kande'é rá iin ño'oma tóon kéi ñoo ñoó, dá kaa ra:

—Ni iin tó'ón ta'on ñoo ko ní kándeé ki'in tá'an xí'ín ñoo ká'ano káa.

¹⁹ Ta chikodó rá ñoyaká ñó'o diní rá, ta kayu'ú rá, ta kuaki ra, ta nda'í ka'an ra, chi kaa ra:

—Nda'í kúu ví ñoo ká'ano káa, nda'í kúu víán, chi ñoo káa ni kedaá xí'ín ndidaá ta kómí barco, dá ni kekuíká rá mií rá xí'ín ña kuiká ió nooán. Tído iin hora di'a ni naá ña —kaa ra.

²⁰ Sa'á ñoó kadii iní ndo'ó, na ndéi induú, sa'á ña ndo'o ñoo ñoó dión, ta kadii iní ndo'ó, na kúu ñayuu Ndios, xí'ín ndo'ó, na kúu apóstol, xí'ín

ndo'ó, na kúú profeta, dá chi sa ni dandó'o Ndios nío ñoo ñoo sa'á ña ni keeán xí'ín ndó.

²¹ Dá ni tiin iin ángel ndakí nda'o iin yuu ká'ano, ña kaa táto'on ki'o kaa iin yuu molino. Dá ni dakána na ña noó taño'o, dá ni kaa na:

—Táto'on ki'o ndée téi ni kankao yuu kaa, ki'o dión ndo'o ñoo ká'ano Babilonia, dá naá ñá, ta ni iin kuu ka o nándió kooan. ²² Ta ni iin kuu ka o kueídó'o yó dáká'a na ñoo kaa yaa xí'ín arpa, ni o káta ka na, ni flauta ni trompeta ka o tuú na, ta ni ra ti'a káva'a ña luu ndaa o kándeí ka, ta ni ña xido molino o kueídó'o ka yo ñoo ñoo. ²³ Ta ni ñó'o íti ka o kái ñoo kaa, ta ni o kueídó'o ka yo kantó'on na ko'on tanda'a. Dión ndo'an, chi ta sa naka'án nda'i sa ndei ñoo ñoo sa kuu ra ta ndaya'i noó na ndei ñayuu yó'o, ta ni danda'í na ñoo ñoo ndidaá tá'an nación xí'ín ña tadí. ²⁴ Ta ñoo kaa sa sati na nii ndidaá profeta xí'ín nii ñayuu Ndios xí'ín nii ndidaá na ni sa'ání ná ñayuu yó'o.

19 ¹ Ni ndi'i, dá ni seido'i táí ká'an kuá'a nda'o ñayuu chí induú, ta kaá na:

iAleluya, na ká'ano kúú Ndios, sato'o mií yó!

Mií ná kúú na dákaki ñaá,

mií ná natiin ñañó'ó xí'ín to'on ndato xí'ín ndidaá choon,

² dá chi keyíko ndaa na, ta keyíko va'a na sa'a iin rá iin ñayuu, sa'á ñoo ni keyíko na sa'á ña kini ni kee ñá'a xixi kée díko mií noó ta,

dá chi ni datúúán ndidaá ñayuu ndei noño'o,

sa'á ñoo ni ya'a na ni kee na kuachi.

Ta ni naki'in ya'i Ndios noo ñá'a ñoo

sa'á ña ni sataan nii ñayuu sa xino kuáchí noo ná.

³ Dá ni kaa tuku ñayuu kuá'a ñoo:

—iAleluya! Chi ño'oma tóon kána noo kái ñoo ká'ano ñoo. Ta daá kuití kana ña.

⁴ Ta ndin oko komi ta sá'ano ñoo xí'ín ndin komi ña takí ñoo ni sa kuíta xití, dá ni sa ndaño'o na Ndios, na ió dándáki noo téi ñoo, ta kaá na:

—iDión ná koo! iAleluya!

⁵ Dá ni seido'i ni ka'an na nda noo ió Ndios dándáki na noo téi ñoo, ta kaá na:

Ndidaá tá'an ndo'ó, na xínkuáchí noo Ndios, keká'ano ndó Ndios.

Ta keká'ano ta'ani ñaá ndo'ó, na yu'ú ni'ini ñaá,

á mií ndó yata ndó, o á mií ndó kuálí ndó.

⁶ Ni ndi'i, dá ni seido'i táí ká'an kuá'a nda'o ñayuu, ta noo ká'an na ní'i táto'on ki'o ní'i xido xíka takuí ini yuta, ta ní'i ta'ani táto'on ki'o ní'i tá káyu'ú dai, ta kaá na:

Aleluya, dá chi dándáki sato'o yo Ndios,

na kándéé kée ndidaá tá'an ña'a.

⁷ Ná kadii inío, ta ná kandeí dii yo, ta naki'o yó ñañó'ó noo ná,

dá chí sà nì kasandaá va kuu tanda'a na kúú léko xí'ín ñadi'í na,
ta sà io nduu va ñadi'í na ña kían tanda'a ná xí'ín ná.

⁸ Chí nì natiin ñadi'í na dá'on táyíí ndáa, ta ndato kuxí ña, ta ndato yé'an.

Dá chí ña dándáki dá'on táyíí ndáa ñoó kúú ndidaá ña va'a nì kee ñayuu Ndios.

Ndiká'án ví na ko'on kadíni víko noo tanda'a na kúú léko

⁹ Dá nì ka'an ángel ñoó xí'ín yu'u:

—Taa ña ko'in ka'in xí'ón: “Ndiká'án ví na nì nakana Ndios ko'on kadíni víko noo tanda'a na kúú léko.”

Dá nì kaa ta'ani na xí'ín:

—Miían ndaa kuiti to'on mií Ndios kían ká'in xí'ón —kaá na.

¹⁰ Dá nì sà kuín xitíí noo ná, dá nì ka'in kandaño'i na. Tído nì kaa na xí'ín:

—Ná dá'a ni keeón dión, dá chí iin ta xíno kuáchí dáó xí'ín vóon noo Ndios kúú yu'u, táto'on k'i'o kée dao ka ñanon, na xí'o ndaa kuendá sa'a Jesús. Kua'án kandaño'o iin tó'ón dinì Ndios. Chí to'on ndaa Jesús kían dátoon ñaxintóni profeta, dá ká'an na sa'a ña vei koo.

Yó'o nì karxóo iin na kánóo iin kuéi kuxí

¹¹ Dá nì xini nì nono induú, ta kúú nì xini iin kuéi kuxí, ta kánóo iin taa sata ri, ta naní ná, Na Kéndúsá'ano, Na Ndaa. Dión naní ná, dá chí keyíko ndaa na, ta ko naá ndava'a na xí'ín ni iin tó'ón ñayuu. ¹² Táto'on k'i'o ndé'é ño'ó ita, k'i'o dión ndé'é nduchí nóo na. Ta kua'á nda'o corona kándodó dinì ná. Ta né'e na iin kuu, tído ko íin ta'on kátóni ini ndi kóni kaa kuu ñoó, sava'a iin tó'ón mií vá ná ná'á. ¹³ Ta ndíxi na iin dá'on nì nakuchi nij. Ta naní ná, To'on Mií Ndios. ¹⁴ Ta kua'á nda'o tu'u soldado Ndios ndéi induú tákuei ra vei ra satá na kánóo kuéi kuxí ñoó. Táyíí nda'o ndáa dá'on ndato kuxí ndíxi ra vei ra, ta kándodó ta'ani ra kuéi kuxí vei ra sata ná. ¹⁵ Tárnee iin espada deen yú'u ná dárkue'e na ñayuu ndéi iin rá iin nación xí'án. Ta xí'ín vara ka dándáki ñaá ná. Ta mií ná ko'óni uva xí'ín sa'a ná, dá kana ndúta ri. Ta kirá yó'o dándáki ña xido nda'o ini Ndios, na kándéé kée ndidaá ña'a. ¹⁶ Ta dá'on ndíxi na ndá'a iin kuu, ta di'in na viti ndá'a ña. Ta kuu yó'o kaá di'a: “Rey noo ndidaá kúú rey, Sato'o noo ndidaá kúú sato'o.”

¹⁷ Nì ndi'i, dá nì xini íin iin ka ángel noo ndindii, dá nì kayu'ú ángel ñoó, dá kaá na xí'ín ndidaá laa tánee me'í induú:

—Nakíi ndidaá ndo'ó nditútí ndi'i ndó kadíni va'a ndó koño kee Ndios,

¹⁸ dá chí ko'on na k'i'o na koño rey keí ndo, xí'ín koño ta dándáki soldado, xí'ín koño ta ndakí xí'ín koño kuéi xí'ín koño ra nì sà ndodó rí, xí'ín koño ndi ndáa mií vá ñayuu, á mií ná kúú ná sato'o o mií ná kúú ná na ñó'o tixi ndá'a sato'o, á mií ná kuálí ná o á mií ná ná'ano na.

¹⁹ Ndi'i, dá n̄i xinií kítí chiká'ano ñoó xí'ín ndidaá rey dándáki noñ'o yó'o xí'ín soldado ra. Ndidaá taa yó'o n̄i nditútí naá xí'ín na kánoo sata kuéi kuxí ñoó, xí'ín soldado Ndios vei xí'ín ná ñoó. ²⁰ Dá ví n̄i kankao kítí chiká'ano ñoó xí'ín profeta to'on ñoó noo ndá'a ná. Ta profeta ñoó kúu ra sa kandeé sa kee ña ná'ano noo ñayuu n̄i kee kítí ká'ano ñoó, ta dión sa danda'í ra na n̄i natiin tóni kítí ñoó, ta n̄i sa ndaño'o na na'áná ri. Dá n̄i dakána ni'ini Ndios kítí ñoó xí'ín profeta to'on ñoó ini takuif kúu ño'ó ita xí'ín azufre. ²¹ Ta dao ka taa ñoó n̄i xi'i n̄i kee espada tánee yú'u na kánoo kuéi kuxí ñoó. Dá n̄i ndutú'u ndidaá laa n̄i seí ri koño taa ñoó nda n̄i ndinoo ini ri.

Dándáki Cristo Jesús iin mil kuia

20 ¹ Ni ndi'i, dá n̄i xinií konoo iin ángel vei na nda induú, ta né'e na nda'á kaa yé'é yái konó, noo koó noo sá tuu, ta né'e na iin cadena chikáni vei na. ² Dá n̄i kandeé ná n̄i tiin na kirí kúu koó ká'ano ñoó, kirí naní Satanás, kirí kúu timí'á, ta n̄i so'oni na rí xí'ín cadena né'e na ñoó, dá ná kandiko ri iin mil toon kuia. ³ Ta n̄i dakána na ri nda maá ini yái konó ñoó, ta n̄i sadi na yé'án, ta n̄i kani na sello yé'án, dá ná dá'a ni konó ni iin tó'on ñayuu noo n̄i sadi na, dá kían ná dá'a ka ni keta rí danda'í ri ni iin ka nación nda ná xinkoo iin mil kuia. Tá n̄i ndi'i, dá kánian ndaxi ri cháá tiempo.

⁴ Dá n̄i xinií ndíta téi ta sa'ándá choon, ta ñoó n̄i nandei ndidaá na n̄i natiin choon ña keyíko na sa'á ñayuu. Ta n̄i xini ta'anii nio na n̄i ta'anda diko sa'á ña sa xí'o ndaa na kuenda sa'a Jesús, xí'ín sa'á ña kándisa na to'on Ndios. Na yó'o kúu na ko ní sá ndaño'o kítí chiká'ano ñoó, ta ni na'áná ri, ta ni tóni ri ko ní ñani taan na ni ndá'a ná. Ndidaá na yó'o n̄i nataki, ta n̄i ni'i ná ña dándáki na xí'ín Cristo iin mil toon kuia. ⁵ Chi na yó'o kúu na mií noo n̄i nataki. Tído dao ka na kúu ndii, o nátaqi ta'on na nda ná xinkoo iin mil kuia. ⁶ Ndiká'án ví na nataki mií noo, ta kakuu ta'ani na na ii, dá chi o koní ta'on na kuu na ta'ándá kúu uu. Di'a ni'i tá'i ná kakuu na duti mií Ndios xí'ín duti Cristo, ta dándáki na xí'ín ná iin mil toon kuia.

Di'a koo tá dákana Ndios timí'á nda maá ini taño'o noo kéi ita ño'o xí'ín azufre

⁷ Tá ná xinkoo iin mil toon kuia ñoó, dá ví ndaxi timí'á yái konó noo ndadi ni'ini rí. ⁸ Dá ví keta rí kanoo rí danda'í ri na ndei ndidaá nación ño'o ndin komi xoo tachí noñ'o'o. Nda noo kúu kuenda Gog xí'ín nda noo kúu kuenda Magog kanoo rí danda'í ri ñayuu, dá nditútí rí na, dá ko'on na xí'ín rí naá ri xí'ín ñayuu Ndios. Táto'on kua'a kúu notí ndei yu'ú taño'o, ki'o dión ví kua'a kakuu ñayuu nditútí rí. ⁹ Chi n̄i kii na iin rá iin xoo ñayuu, nda noo xí'ká cháá ka, dá kao noo na ñoo noo ndei tu'u ñayuu Ndios, noo kúu ñoo mani noo Ndios. Tído dákoon Ndios ño'ó

kéi ita sata ná, dá naá ndí'i na. ¹⁰ Ta timí'á, kirí ni danda'í ñayuu ñoó, dákána ñaá Ndios ko'on ri nda maá ini taño'o noo sá'ano ita ñó'o xí'ín azufre, noo nákaa kítí chiká'ano ñoó xí'ín profeta to'on ñoó. Ta daá kuití ndo'o naní nío ri nduú ñoó xí'ín profeta ñoó.

Ió Ndios iin téi kuxí, ta keyíko na sa'a ñayuu

¹¹ Ni ndi'i, dá ni xini iin téi kuxí ká'ano, ta ni xini ta'anii na ió dándáki ñoó. Ta ni naá noño'o xí'ín induú noo na ió ñoó, ta ni iin tó'on ta'on xían ko ní nátuu kaan. ¹² Dá ni xini ndíta ndidaá na ni xi'i, na ndáya'i xí'ín na ko ndáya'i noo Ndios. Dá ví ni nono ndidaá libro ñoó. Ta ni nono ta'ani iin ka libro, ta ña yó'o kúú libro noo kándodó kuu na ni'í ña kataki chíchí ná. Dá ví ni keyíko sa'a iin rá iin na ni xi'i ñoó táto'on káa rá ió ña kándodó noo dao ka libro ñoó, chi ni keyíko na sa'a ña ni kee na. ¹³ Ta ni nakí'o taño'o ndidaá ñayuu ni xi'i ñó'o noo ra. Ta ni nakí'o ta'ani ña kedaá xí'ín ñayuu, dá xí'i na, ndidaá tá'an ñayuu ñó'o tixi ndá'an. Ta ni nakí'o ta'ani yái ndii ndidaá ndii ñó'o inian. Dá ví ni keyíko sa'a iin rá iin na táto'on kí'o káa rá ió ña'a ni kee na. ¹⁴ Ta ña kedaá xí'ín ñayuu, dá xí'i na, xí'ín yái ndii ni sata Ndios ña kua'an ini takuí kúú ñó'o ita. Ña yó'o dándáki ña kuu ñayuu ñoó ta'ándá kúú uu. ¹⁵ Tá'an na ko kándodó kuu noo libro noo kándodó kuu na ni'í ña kataki chíchí ñoó, noon kúú na ni dakána Ndios ini takuí kúú ñó'o ita.

Kava'a Ndios iin noño'o saá xí'ín induú saá

21 ¹ Ni ndi'i, dá ni xini iin induú saá xí'ín iin noño'o saá, dá chi induú mií noo xí'ín noño'o mií noo ni ya'a vaan kua'an, ta koó ka va taño'o nákaa. ² Dá ni xini mií yu'u, Juan, ña kúú ñoo Jerusalén saá, ña kúú ñoo i. Ta ni xini konooan vei ña nda induú ni kee mií Ndios, ta luu ni kenduuan mián táto'on kée iin ñá'a ni kenduu mií vei natiin yíian. ³ Dá ni seido'i ni kayu'ú iin na nda induú, ta kaá na:
—Kande'é, ña xaan kúú ve'e ño'o Ndios, ta viti íian noo ndéi ñayuu na, dá chi koo na xí'ín ñayuu na, ta kakuu na na ñoo mií Ndios, ta kanoo mií Ndios tein na, ta kakuu na Ndios noo ná. ⁴ Ta dánayaa Ndios ndírnoo ñayuu na. Ta o kuú ka na, ta ni o kúnda'í ka ini na, ta o kuáki ka na, ta o ndó'o ka nío ná, dá chi ndidaá ña'a sa ndo'o na tá sata ni kexoo vaan.

⁵ Dá ni kaa na ió dándáki noo téi ñoó:

—Kande'é ndó, yu'u kúú na ndésaá ndidaá tá'an ña'a.

Dá ni kaa na xí'ín yu'u:

—Taa ndidaá ña yó'o, dá chi ndino'o ña ndaa kían ká'in, ta miían ndaa kooan.

⁶ Ta ni kaa ta'ani na xí'ín yu'u:

—Sa ni kuu va viti. Yu'u kúú to'on mií noo xí'ín to'on noo ndí'i, ta kúú na mí sa'a xí'ín na noo ndí'i. Tá ió iin káa na íchi ini, nakí na noo

yu'u, dá k̄i'o oon yu'u takuif kána ndita ko'o na, kirá xí'o ña kataki chíchí ná. ⁷ Ta ndi ndáa na ni kandeé ni xinkuei, noón kúu na natiin ndidaá tá'an ña va'a noó yu'u, dá chi yu'u kakuu Ndios noo ná, ta mií ná kakuu de'e noó yu'u. ⁸ Tído ñayuu ko ndéé iní, xí'ín na ko kándisa yu'u, xí'ín na kée ña ka'an noo, xí'ín na sa'ání ndij, xí'ín na kée kuachi xí'ín na ko kúu ñadi'í na o yíi ná, xí'ín na tadí, xí'ín na ndáño'o yoko xí'ín ndidaá na to'ón, noón kúu na ni ni'i tá'i ña kaño'o na ini takuif kúu ño'ó ita xí'ín azufre. Ña yó'o dándáki ña kuu na ta'ándá kúu uu —kaá Ndios.

Kava'a Ndios iin ñoo Jerusalén saá

⁹ Ni ndi'i, dá ni kixi iin ángel nákaa tein ndin usa ángel ni sa ne'e ndin usa copa ni chití ni sa ño'o tandó'ó sa ni ya'a ñoó, dá ni kaa na xí'ín:

—Nakíi chí yó'o di'a, dá ko'in dána'i nooon na ko'on tanda'a, na kakuu ñadi'í na kúu léko ñoó.

¹⁰ Dá ndáka na kúu Espiritu Ndios yu'u ni sa'an na dini iin yúku ká'ano dikó iin ñoó, dá ni daná'a na iin ñoo ká'ano nda'o nooí, ta ñoo ñoó kúu ñoo ii, ña kúu ñoo Jerusalén, ña kían konoo vei nda induú ni kee Ndios.

¹¹ Ta ndato oon ví náye'e ndaa ñoo ñoó táto'on k̄i'o ndato náye'e ndaa mií Ndios. Ta nádíon ña táto'on k̄i'o nádíon yuu ndato xíxi díon, ta ndé'an táto'on k̄i'o ndé'é yuu naní jaspe, chi yé'an táto'on k̄i'o yé'e yuu tatá. ¹² Ta ndíka nda'o náo ni kao noo ñoo ñoó, ta dikó nda'o ña, ta uxí uu kúu yé'an, ta ndíta iin iin ángel yé'an, ta iin rá iin yé'an ñoó tándaa iin rá iin kuu ndin uxí uu de'e ta naní Israel. ¹³ Ta chí xoo noo xínkoo ndindii ñó'o oni yé'an, ta chí xoo norte ñó'o ta'ani oni yé'an, ta chí xoo sur ñó'o ta'ani oni yé'an, ta chí xoo noo sá nóo ndindii ñó'o ta'ani oni yé'an. ¹⁴ Ta uxí uu kúu yuu sa'a náo ñoo ñoó, ta iin rá iin yuu sa'a náo ñoó tándaa iin iin kuu na kúu apóstol, na sa xionoo xí'ín na kúu léko.

¹⁵ Ta né'e ángel ñoó iin vara oro, dá chikí'ó na ñoo ñoó, xí'ín yé'an xí'ín náo ñá. ¹⁶ Ta komi xoo kúu ñoo ñoó, ta ña ndíkaan xí'ín ña kánián, iin nóo vá ndáaan. Dá ni chikí'ó na ñá xí'ín vara oro ñoó, ta uu mil komi ciento kilómetro kúu ña kánián, ta uu mil komi ciento kilómetro kúu ña dikóan, ta uu mil komi ciento kilómetro kúu ña ndíkaan. ¹⁷ Ta ni chikí'ó na náo ñá, ta kían oni diko uxí komi metro táto'on k̄i'o chíki'ó ñayuu, chi k̄i'o díon ni chikí'ó ñaá ángel ñoó. ¹⁸ Ta yuu ni kava'a náo ñoó kúu yuu naní jaspe. Tído mií ñoo ñoó ni kava'a xí'ín oro ndino'o, ta díon ña táto'on ndato díon yuu tatá. ¹⁹ Ta yuu sa'a náo ñoó ni kava'a xí'ín yuu luu ndáa, ta yuu sa'a náo mií noó ni kava'a xí'ín yuu naní jaspe, ta ña kúu uu ni kava'a xí'ín yuu naní zafiro, ta ña kúu oni ni kava'a xí'ín yuu naní ágata, ta ña kúu komi ni kava'a xí'ín yuu naní esmeralda, ²⁰ ta ña kúu o'on ni kava'a xí'ín yuu naní ónice, ta ña kúu iño ni kava'a xí'ín yuu naní cornalina, ta ña kúu usa ni kava'a xí'ín yuu naní crisólito, ta ña kúu ona ni kava'a xí'ín yuu naní berilo, ta ña kúu iin ni kava'a xí'ín

yuu naní topacio, ta ña kúú uxí nì kava'a xí'ín yuu naní crisopraso, ta ña kúú uxí iin nì kava'a xí'ín yuu naní jacinto, ta ña kúú uxí uu nì kava'a xí'ín yuu naní amatista. ²¹ Ta uxí uu yé'é ñoo nì kava'a xí'ín uxí uu perla, sa'á ñoo iin rá iin yé'é ñoo kúú iin perla. Ta keí oro kúú keí ño'oo ñoo ñoo, ta yé'an táto'on yé'e yuu tatá.

²² Ta ni iin tó'ón ve'e ño'oo kō ní xiníi iin ñoo ñoo, dá chí sato'o yo Ndios, na kándéé kée ndidaá ña'a, noón vá kúú ve'e ño'oo ió ñoo ñoo, xí'ín na kúú léko. ²³ Ta kō xínñó'ó ta'on ñoo ñoo ndindii, ni yoo, dá katoon, dá chí mií vá Ndios dáye'e sa'á ña ndato téi na, ta mií léko ñoo kúú ñó'oo dátoon iin níi ñoo ñoo. ²⁴ Ta ñayuu nì kākī ndéi iin rá iin nación kanoo noo náye'e ndaa ñoo ñoo, ta ndidaá tá'an ña kuiká xí'ín ñañó'ó naki'o ta sa kuu rey noñó'oo yó'oo noo ñoo ñoo. ²⁵ Ta ni iin kuu ta'ón o ndadí yé'an, dá chí ni iin kuu ka o kuaá ñoo. ²⁶ Ta kane'e na ndidaá ña kuiká xí'ín ñañó'ó nì sa komí iin rá iin nación ko'on na nakí'oo naan noo ñoo ñoo. ²⁷ Ta ni iin tó'ón ta'on ña yakó o kúu ku'u ñoo ñoo, ni na kée ña kini, ni na to'ón. Sava'a na kataki chíchí kándodó kuu noo libro na kúú léko, noón vá kúú na kuu ndu'u ñoo ñoo.

22 ¹ Nì ndi'i, dá nì daná'a ángel ñoo iin yuta ndato nda'oo nooí. Ta yuta ñoo xíka takuíi xí'oo ña kataki yo, ta ndato yé'e ra táto'on kí'oo yé'e yuu tatá. Ta takuíi yó'oo kána mií tixi téi noo ió Ndios dándáki na xí'ín na kúú léko. ² Ta me'í keí nákaa mií ñoo ñoo nákaa yuta ñoo. Ta ndíta yíto ndin nduú xoo yu'ú yuta ñoo, ta yíto ñoo xí'oo ña kataki yo. Ta iin rá iin yoo xí'oo rá ku'i, chí uxí uu ta'ándá xí'oo rá ku'i noo kuía. Ta ndá'a yíto ñoo kúú tata nduva'a ñayuu ndéi iin rá iin nación. ³ Ta ni iin ka chi'an o koo noo ñayuu kandeí ñoo. Ta ñoo kuiin téi noo koo Ndios dándáki na xí'ín na kúú léko, ta koni kuáchí ñayuu na noo ná. ⁴ Ta koni túu na noo Ndios, ta kanda'a kuu mií Ndios taan na. ⁵ Ta ni iin kuu ta'ón o kuaá ñoo ñoo. Ta ni o kónñó'ó ka na ni iin tó'ón ñó'oo katoon noo ná, ni ndindii, dá chí mií vá Ndios, na kúú sato'o yo, katoon noo ná. Ta daá dándáki kuií Ndios.

Sa kuyati va ña nandió koo Jesús kasaá na

⁶ Dá nì kaa ángel ñoo xí'ín:

—Ña ndaa kúú to'on yó'oo, ta miían ndaa xinkoo noo ká'an. Sa'á ñoo sato'o yo Ndios, na kúú Ndios xí'oo ña kándaá ini na kúú profeta na sa'a ndí kián koo, noón kúú na nì tanda'á iin ángel kéchóon noo ná noo yo'ó, dá dána'a na noo ñayuu mií ná sa'a ndidaá ña yati vei koo, ña kúú ña kánian koo.

⁷ —Kana'ón ña sa yati ñó'ó vá kasaai —kaá Jesús.

Ndiká'an ví na né'e va'a ndidaá to'on nákaní libro yó'oo sa'á ña vei koo.

⁸ Ta mií yu'u, Juan, kúú na nì seídó'oo ndidaá ña yó'oo, ta nì xinií xí'ín nooí ña. Tá nì ndi'i nì seídó'i ña, ta nì xinií ña, dá nì sa kuíin xitíi kua'in kandaño'i ángel, na nì dána'a ndidaá ña yó'oo nooí. ⁹ Dá nì kaa na xí'ín:

—Koó, ná dá'a ni keeón dión, dá ch̄i iin n̄a xínkuáchí dáó xí'ón kúu yu'u, táto'on k̄i'o kée dao k̄a ñan̄on, n̄a kúu profeta, xí'ín to'on kée n̄a ndíta toon xí'ín to'on dána'a libro yó'o. Kua'án kandaño'o iin tó'ón dini míí Ndios.

¹⁰ Ta n̄i kaa ta'ani na xí'ín:

—Ná dá'a ni kadon libro yó'o xí'ín sello, dá ch̄i s̄a yati ñó'ó vá vej koo ña kásto'an sa'a. ¹¹ Sa'á ñoó n̄a k̄o kúu ñayuu ndaa, ta k̄i'o dión ná kakuu ij vá ná. Ta n̄a kúu ñayuu k̄ini, ná kee ij vá ná ña kini. Ta n̄a kendaá, ná kendaá ij vá ná. Ta n̄a ió vii noo Ndios, ná koo vii ij vá ná.

¹² —iKana'ón ña s̄a yati ñó'ó vá kasaai! Ta chiya'avii iin rá iin ñayuu táto'on k̄i'o káa choon n̄i kee na. ¹³ Yu'u kúu to'on míí noó xí'ín to'on noo ndí'i, ta kúu n̄a míí sa'a xí'ín n̄a noo ndí'i. Yu'u kúu n̄a míí noó, ta yu'u kúu n̄a noo ndí'i —kaá Jesús.

¹⁴ Ndiká'án ví n̄a n̄i dandóo dá'on ndíxi na, dá ch̄i ió ích̄i ná ña k̄ian keí ná kui'i kána noo yíto, kirá xí'o ña kataki yo. Ta ió ta'ani ích̄i ná ku'u na iin rá iin yé'é ñoo ñoo. ¹⁵ Tído sata vé'e va kandoo t̄ina, xí'ín n̄a tadí, xí'ín n̄a kée kuachi xí'ín n̄a k̄o kúu ñadi'í n̄a o yíi ná, xí'ín n̄a sa'ání ndii, xí'ín n̄a ndaño'o yoko, xí'ín ndidaá n̄a kátóo dánda'í dao k̄a ñayuu.

¹⁶ —Míí yu'u, Jesús, kúu n̄a n̄i tanda'á iin ángel kéchóon nooí, dá k̄i'o ndaa n̄a kuendá sa'a ndidaá ña yó'o noo ndidaá n̄a kúu kuendá míí. Yu'u kúu n̄a n̄i kii tein n̄a ve'e rey David, ta yu'u kúu t̄iño ndato xínkoo tá kua'an tuu —kaá n̄a.

¹⁷ Ta kaá n̄a kúu Espíritu Ndios:

—Nakíi.

Ta kaá ta'ani yó, n̄a kúu ñadi'í Jesús:

—Nakíi ní.

Ta ndo'ó, n̄a seídó'o to'on yó'o, kaa ta'ani ndó:

—Nakíi ní.

Ta ndo'ó, n̄a ích̄i ini, nakíi ndo. Ta ndi ndaa ndó ká'án ko'o takuií, dá k̄ian ko'o oon ndó takuií xí'o ña kataki yo.

¹⁸ Sa kásto'in xí'ín ndidaá tá'an n̄a seídó'o to'on tándaa noo libro yó'o, ña ká'an sa'a ndí k̄ian koo chí noo, ña tá n̄i ch̄indaá noo ná n̄i ch̄ikodó ná cháá k̄a to'on noo tuti yó'o, dá k̄ian tanda'á Ndios ndidaá tá'an kue'e kiiian noo ná, ña k̄ian ká'an libro yó'o sa'a. ¹⁹ Ta tá n̄i ch̄indaá noo ná n̄i d̄itá ná dao to'on tándaa noo libro yó'o, ña ká'an sa'a ña vej koo, dá k̄ian ko'on ta'ani Ndios d̄itá ná kuu ná, ña kánóo noo libro noo kándodó kuu n̄a kataki chíchí, ta o kónó ná ña kandeí na ñoo ij ñoo, ña ká'an libro yó'o sa'a.

²⁰ Míí n̄a xí'o ndaa kuendá sa'a ña yó'o kúu n̄a kaá di'a:

—Míian ndaa kuiti yachi va kasaai.

¡Dión ná koo! ¡Nakíi ní, Jesús, míí ní n̄a kúu sato'o ndu!

²¹ Ná koo ña maní xí'o sato'o yo Jesucristo xí'ín iin rá iin ndó. Dión ná koo.